

醫
統
正
脈
全
書

十
九

脈經目錄

卷一

脈形狀指下祕訣第一

平脈早晏法第二

分別三關境界脈候所主第三

辨尺寸陰陽榮衛度數第四

平脈視人大小長短男女逆順法第五

持脈輕重法第六

兩手六脈所主五臟六腑陰陽逆順第七

辨腑臟病脈陰陽大法第八

辨脈陰陽大法第九

平虛實第十

從橫逆順伏匿脈第十一

辨災怪恐怖雜脈第十二

遲疾短長雜脈第十三

平人得病所起脈第十四

診病將差難已脈第十五

卷二

平三關陰陽二十四氣脈第一

平人迎神門氣口前後脈第二

平三關病候并治宜第三

平奇經八脈病第四

八脈為病不在十二經故以繫此卷之末案十一從秦定

本諸本並作十一

卷三

肝膽部第一

心小腸部第二

脾胃部第三

肺大腸部第四

腎膀胱部第五

卷四

辨三部九候脈證第一

平雜病脈第二

診五藏六腑氣絕證候第三

診四時相反脈第四

診損至脈第五

診脈動止投數疏數死期年月第六

診百病死生訣第七

診三部脈虛實決死生第八

卷五

張仲景論脈第一

扁鵲陰陽脈法第二

扁鵲脈法第三

扁鵲華佗察聲色要訣第四

扁鵲診諸反逆死脈要訣第五

卷六

肝足厥陰經病證第一

膽足少陽經病證第二

心手少陰經病證第三

小腸手太陽經病證第四

脾足太陰經病證第五

胃足陽明經病證第六

肺手太陰經病證第七

大腸手陽明經病證第八

腎足少陰經病證第九

膀胱足太陽經病證第十

三焦手少陽經病證第十一

卷七

病不可發汗證第一

病可發汗證第二

病發汗以後證第三

病不可吐證第四

病可吐證第五

病不可下證第六

病可下證第七

病發汗吐下以後證第八

病可溫證第九

病不可灸證第十

病可灸證第十一

病不可刺證第十二

病可刺證第十三

病不可水證第十四

病可水證第十五

病不可火證第十六

病可火證第十七

熱病陰陽交并少陰厥逆陰陽竭盡生死證第十

八

重實重虛陰陽相附生死證第十九

熱病生死期日證第二十

熱病十逆死日證第二十一

熱病五藏氣絕死日證第二十二

熱病至脈死日證第二十三

熱病損脈死日證第二十四

卷八

平卒中厥脈證第一

平痙濕暈脈證第二

平陽毒陰毒百合狐惑脈證第三

平霍亂轉筋脈證第四

平中風歷節脈證第五

平血痺虛勞脈證第六

平消渴小便利淋脈證第七

平水氣黃汗氣分脈證第八

平黃疸寒熱瘡脈證第九

平胸痺心痛短氣賁豚脈證第十

平腹滿寒疝宿食脈證第十一

平五藏積聚脈證第十二

平驚悸衄吐下血胸滿瘀血脈證第十三

平嘔噦下利脈證第十四

平肺痿肺癰欬逆上氣淡飲脈證第十五

平癰腫腸癰金瘡浸淫脈證第十六

卷九

平妊娠分別男女將產諸證第一

平妊娠胎動血分水分吐下腹痛證第二

平產後諸病鬱冒中風發熱煩嘔下利證第三

平帶下絕產無子亡血居經證第四

平鬱冒五崩漏下經閉不利腹中諸病證第五

平咽中如有炙鬱喜悲熱入血室腹滿證第六

平陰中寒轉胞陰吹陰生瘡脫下證第七

平婦人病生死證第八

平小兒雜病證第九

卷十

手檢圖二十一部

脈經卷五

張仲景論脈第一

扁鵲陰陽脈法第二

扁鵲脈法第三

扁鵲華佗察聲色要訣第四

扁鵲診諸反逆死脈要訣第五

張仲景論脈第一

問曰脈有三部陰陽相乘榮衛氣血在人體躬

千金作而行人

躬呼吸出入上下於中因息游布津液流通隨時動作

倣象形容春弦秋浮冬沈夏洪察色觀脈大小不同一時之間變無經常尺寸參差或短或長上下乖錯或存或亡病輒改易進退低昂心迷意惑動失紀綱願爲縷陳令得分明

師日子之所問道之根源脈有三部尺寸及關榮衛流行不失衡銓腎沈心洪肺浮肝弦此自經常不失銖分出入升降漏刻周旋水下二刻脈一周身旋復寸口虛實見焉變化相乘陰陽相干風則浮虛寒則緊弦沈潛水瀆支飲急弦動弦爲痛數洪熱煩設有不應知變所

緣三部不同病各異端太過可怪不及亦然邪不空見
中必有奸審察表裏三焦別分知邪所舍消息診看料
度腑藏獨見若神爲子條記傳與聖人

扁鵲陰陽脈法第二

脈平旦曰太陽日中曰陽明晡時曰少陽黃昏曰少陰
夜半曰太陰鷄鳴曰厥陰是三陰三陽時也

少陽之脈乍小乍大乍長乍短動搖六分壬十一月甲

子夜半正月二月甲子壬

太陽之脈洪大以長其來浮於筋上動搖九分三月四

月甲子王

陽明之脈浮大以短動搖三分大前小後狀如科斗其
至跳五月六月甲子王

少陰之脈緊細動搖六分王五月甲子日中七月八月
甲子王

太陰之脈緊細以長乘於筋上動搖九分九月十月甲
子王

厥陰之脈沈短以繁動搖二分十一月十二月甲子王
厥陰之脈急弦動搖至六分以上病遲脈寒少腹痛引

腰形喘者死脈緩者可治刺足厥陰入五分袁校云遲脈二字疑衍

少陽之脈乍短乍長乍小乍大動搖至六分以上病頭

痛脇下滿嘔可治擾即死一作偃可治偃即死刺兩季肋端足少

陽也入七分

陽明之脈洪大以浮其來滑而跳大前細後狀如科斗

動搖至三分以與病眩頭痛腹滿痛嘔可治擾即死刺

臍上四寸臍下三寸各六分

從二月至八月陽脈在表從八月至正月陽脈在裏附

陽脈強附陰脈弱至卽驚實則癩瘖細而沈案泰定不

癩瘖卽泄泄卽煩煩卽渴渴卽腹滿滿卽擾擾卽腸澀

澀卽脈代乍至乍不至大而沈卽欬欬卽上氣上氣甚

則肩息肩息甚則口舌血出血出甚卽鼻血出

變出寸口陰陽表裏以互相乘如風有道陰脈乘陽也

寸口中前後溢者行案泰定袁校本作勞風寸口中外實內不滿

者三風四溫寸口者勞風勞風者大病亦發駛行汗出

亦發奕風者上下微微扶骨是其診也表緩腹內急者

奕風也猥雷實夾者飄風從陰趨陽者風邪一來調一

來速鬼邪也陰緩陽急者表有風來入藏也陰急者風
風抱陽入腹上遂遂下宛宛不能至陽流飲也上下血
微陰強者爲漏癖陽強者酒癖也偃偷不過微反陽澹
漿也陰扶骨絕者從寸口前頓趨於陰汗水也來調四
布者欲病水也陰脈不偷陽脈傷復少津寸口中後大
前兌至陽而實者癖食小過陽一分者七日癖二分者
十日癖三分者十五日癖四分者二十日癖四分中伏
不過者半歲癖敦敦不至胃陰一分飲舖餌癖也外勾
者久案居敬癖也內卷者十日以還外強內弱者裏案居

敬本作裏大核也并浮而弦者汁核并浮緊而數如沈病暑

食粥一作微有內緊而伏麥飯若餅寸口脈倚陽緊細以

案居敬本作似微瓜菜皮也若倚如緊齋藏菜也蹟蹟無數生

肉癖也附陽者炙肉癖也小倚生浮大如故生麥豆也

案癖泰定居敬本俱作僻

扁鵲脈法第三

扁鵲曰人一息脈二至謂平脈體形無苦人一息脈三

至謂病脈一息四至謂痺者脫脈氣其眼睛青者死人

一息脈五至以上死不可治也都一作聲息病脈來動取

極五至病有六七至也

袁杪云疑有闕文

扁鵲曰平和之氣不緩不急不滑不濇不存不亡不短

不長不俛不仰不縱不橫此謂平脈腎

一作緊

受如此

一作

剛身無苦也

後入字疑衍

扁鵲曰脈氣弦急病在肝少食多厭裏急多言頭眩目

痛腹滿筋攣癩疾上氣少腹積堅時時唾血咽喉中乾

相疾之法視色聽聲觀病之所在候脈要訣豈不微乎

脈浮如數無熱者風也若浮如數而有熱者氣也脈洪

大者又兩乳房胡

案居敬本作動

脈復數加有寒熱此傷寒病

也若羸長病如脈浮溢寸口復有微熱此疰氣病也如復欬又多熱乍劇乍瘥難治也又療無劇者易瘥不欬

者易治也

袁校云疑有闕文

扁鵲華佗察聲色要訣第四

病人五藏已奪神明不守聲嘶者死

病人循衣縫譫言者不可治

病人陰陽俱絕掣衣掇空妄言者死

病人妄言錯亂及不能語者不治熱病者可治

病人陰陽俱絕失音不能言者三日半死

病人兩目皆有黃色起者其病方愈

病人面黃目青者不死青如草滋死

病人面黃目赤者不死赤如衄血死

病人面黃目白者不死白如枯骨死

病人面黃目黑者不死黑如炁死

病人面目俱等者不死

病人面黑目青者不死

病人面青目白者死

病人面黑目白者不死

病人面赤目青者六日死

病人面黃目青者九日必死是謂亂經飲酒當風邪入胃經膽氣妄泄目則爲青雖有天救不可復生

病人面赤目白者十日死憂恚思慮心氣內索面色反好急求棺槨

病人面白目黑者死此謂榮華已去血脈空索

病人面黑目白者八日死腎氣內傷病因留積

病人面青目黃者五日死

病人着牀心痛短氣脾竭內傷百日復愈能起徬徨因

坐於地其立倚牀能治此者可謂神良

病人面無精光若土色不受飲食者四日死

病人目無精光及牙齒黑色者不治

病人耳目鼻口有黑色起入於口者必死

病人耳目及顴頰赤者死在五日中午

病人黑色出於額上髮際下直鼻脊兩顴上者亦死在

五日中午

病人黑氣出天中下至年上顴上者死

千金翼云天中當鼻直上至髮

際年上在鼻上兩目間

病人及健人黑色若白色起入目及鼻口死在三日中

病人及健人面忽如馬肝色望之如青近之如黑者死

病人面黑目直視惡風者死

病人面黑脣青者死

病人面青脣黑者死

病人面黑兩脇下滿不能自轉反者死

病人目案居敬本目下有回回二字直視肩息者一日死

病人頭目久痛卒視無所見者死

病人陰結陽絕目精脫恍惚者死

病人陰陽絕竭目眶陷者死

病人目系傾者七日死

病人口如魚口不能復閉而氣出多不反者死

病人口張者三日死

病人唇青人中反者三日死

病人唇反人中滿者死

病人唇口忽乾者不治

病人爪甲青者死

病人爪甲白者不治

病人手足爪甲下肉黑者八日死

病人榮衛竭絕面浮腫者死

病人卒腫其面蒼黑者死

病人手掌腫無文者死

病人臍腫反出者死

病人陰囊莖俱腫者死

病人脈絕口張足腫者五日死

病人唇腫齒焦者死

病人陰陽俱竭其齒如熟小豆其脈駛者死

千金方
駛作躁

病人齒忽變黑者十三日死

病人舌卷卵縮者必死

病人汗出不流舌卷黑者死

病人髮直者十五日死

病人髮如乾麻善怒者死

病人髮與眉衝起者死

病人足趺腫嘔吐頭重者死

病人足趺上腫兩膝大如斗者十日死

病人臥遺尿不覺者死

病人尸臭者不可治

肝病皮白肺之日庚辛死

心病目黑腎之日壬癸死

脾病脣青肝之日甲乙死

肺病頰赤目腫心之日丙丁死

腎病面腫脣黃脾之日戊己死

青欲如蒼璧之澤不欲如藍赤欲如綿

案居敬本作帛

裹朱不

欲如赭白欲如鶩羽不欲如鹽黑欲如重漆不欲如炭

黃欲如羅裏雄黃不欲如黃土

目色赤者病在心白在肺黑在腎黃在脾青在肝黃色不可名者病在胸中

診目病見赤脈從上下者太陽病也從下上者陽明病也從外入內者少陽病也

診寒熱瘰癧目中有赤脈從上下至瞳子見一脈一歲死見一脈半一歲半死見二脈二歲死見二脈半二歲半死見三脈三歲死

診齟齒痛按其陽明之脈來有過者獨熱在右右熱在左左熱在上上熱在上下熱

診血脈者多赤多熱多青多痛多黑爲久痺多赤多黑多青皆見者寒熱身痛面色微黃齒垢黃爪甲上黃黃疸也安臥少黃赤脈小而濇者不嗜食

扁鵲診諸反逆死脈要訣第五

扁鵲曰夫相死脈之氣如羣鳥之聚一馬之馭系水交馳之狀如懸石之落出筋之上藏筋之下堅闕之裏不在榮衛伺候交射不可知也疑有關文

脈病人不病脈來如屋漏雀啄者死屋漏者其來既絕而止時時復起而不相連屬也雀啄者脈來甚數而疾絕止復頓來也又經言得病七八日脈如屋

漏雀啄者死

脈彈人手如黍米也

脈來如彈石去如解索者死

石彈

者辟辟急也解索者動數而隨散亂無復次緒也

脈困病人脈如蝦之游如魚

之翔者死

蝦游者冉冉而起尋復退沒不知所在久乃復起起輒遲而沒去速者是也魚翔者似魚

不行而但掉尾動頭身搖而久住者是也

脈如懸薄卷索者死脈如轉豆者

死脈如偃刀者死脈涌涌不去者死脈忽去忽來暫止

復來者死脈中侈者死脈分絕者死

上下分散也

脈有表無裏者死經名曰結云即死何謂結脈在指下

如麻子動搖屬腎名曰結去死近也

脈五來一止不復增減者死經名曰代何謂代脈五來

一止也脈七來是人一息半時不復增減亦名曰代正
死不疑

經曰病或有死或有不治自愈或有連年月而不已其
死生存亡可切脈而知之耶然可具知也設病者若閉
目不欲見人者脈當得肝脈弦急而長反得肺脈浮短
而濇者死也病若開目而渴心下牢者脈當得緊實而
數反得沈滑而微者死病若吐血復暈者脈當得沈
細而反浮大牢者死病若譫言妄語身當有熱脈當洪
大而反手足四逆脈反沈細微者死病若大腹而洩脈

當細微而澀反得緊大而滑者死此之謂也

經言形脈與病相反者死柰何然病若頭痛目痛脈反短濇者死

病若腹痛脈反浮大而長者死

病若腹滿而喘脈反滑利而沈者死

病若四肢厥逆脈反浮大而短者死

病若耳聾脈反浮大而濇者死

千金翼云脈大者生沈遲細者難治

病若目眩脈反大而緩者死

左有病而右痛右有病而左痛下有病而上痛上有病

而下痛此爲逆逆者死不可治

脈來沈之絕濡浮之不止推手者半日一作半日死

脈來微細而絕者人病當死

人病脈不病者生脈病人不病者死

人病尸厥呼之不應脈絕者死

脈當大反小者死

肥人脈細小如絲欲絕者死

羸人得躁脈者死

人身澀而脈來往滑者死

人身滑而脈來往澀者死

人身小而脈來往大者死

人身短而脈來往長者死

人身長而脈來往短者死

人身大而脈來往小者死

尺脈不應寸時如馳半日死

千金云尺脈上應寸口太遲者半日死

肝脾俱至則穀不化肝多即死

肺肝俱至則癰疽四肢重肺多即死

心肺俱至則痺消渴懈怠心多即死

腎心俱至則難以言九竅不通四肢不舉腎多即死
脾腎俱至則五藏敗壞脾多即死

肝心俱至則熱甚癩癰汗不出妄見邪

肝腎俱至則疝瘕少腹痛婦人月使不來

肝滿腎滿肺滿皆實則為腫肺之雍喘而兩肱滿肝雍

兩肱案秦定本作脚滿臥則驚不得小便腎雍腳下至少腹滿

脛有大小髀肱大跛易偏枯袁校云雍與癰通

心脈滿大癰癩筋攣

肝脈小急癰癩筋攣

肝脈驚暴有所驚駭脈不至若瘖不治自己

腎脈小急肝脈小急心脈小急不鼓皆為瘕

腎肝并沈為石水并浮為風水并虛為死并小弦

案秦定哀

校本俱作強欲驚

腎脈大急沈肝脈大急沈皆為疝

心脈搏滑為肺疝

脾脈外鼓沈為腸澼久自己

肝脈小緩為腸澼易治

腎脈小搏沈為腸澼下血溫身熱者死心肝澼亦下血

二藏同病者可治其脈小沈濇者爲腸澼其身熱者死
熱見七日死

胃脈沈鼓濇胃外鼓大心脈小腎急背膈偏枯男子發
左女子發右不瘖舌轉可治三十日起其順者瘖三歲
起年不滿二十者三歲死

脈至而搏血衄身有熱者死

脈來如懸鉤浮爲熱

脈至如喘名曰氣厥氣厥者不知與人言
素問甲乙作暴厥

脈至如數使人暴驚三四日自己

脈至浮合浮合如數一息十至十至以上是爲經氣予不足也微見九十日死

脈至如火新然是心精之予奪也草乾而死

脈至如散葉是肝氣予虛也木葉落而死

木葉落作棗華

脈至如省客省客者脈塞而鼓是腎氣予不足也懸去

棗華而死

脈至如泥丸是胃精予不足也榆莢落而死

素問莢作葉

脈至如橫格是膽氣予不足也禾熟而死

脈至如弦縷是胞精予不足也病善言下霜而死不言

可治

脈至如交漆交漆者左右旁至也微見四十日死甲乙作交

脈至如涌泉浮鼓肌中是太陽氣予不足也少氣味非

英而死

脈至如委土素問作頹土之狀按之不得是肌氣予不足也

五色先見黑白壘一作菑發死

脈至如懸雍懸雍者浮揣切之益大是十二俞之予不

足也水凝而死

脈至如偃刀偃刀者浮之小急而按之堅大急五藏苑
熱寒熱獨併於腎也如此其人不得坐立春而死

袁校云苑

鬱通

脈至如丸滑不直手不直手者按之不可得也是大腸
氣予不足也棗葉生而死

脈至如春者令人善恐不欲坐臥行立常聽是小腸氣
予不足也季秋而死

問曰常以春二月中脈一病人其脈反沈師記言到秋
常死其病反愈到七月復病因往脈之其脈續沈復記

言至冬死問曰二月中得沈脈何以故處之至秋死也
師曰二月之時其脈自當濡弱而茲得沈脈到秋自沈
脈見浮卽死故知到秋當死也七月之時脈復得沈何
以處之至冬當死師曰沈脈屬腎真藏脈也非時妄見
經言王相囚死冬脈本王脈不再見故知至冬當死然
後至冬復病正以冬至日死故知爲諦華佗倣此

脈經卷六

肝足厥陰經病證第一

案秦定居敬本無足厥陰經四字下無經名竝同

膽足少陽經病證第二

心手少陰經病證第三

小腸手太陽經病證第四

脾足太陰經病證第五

胃足陽明經病證第六

肺手太陰經病證第七

大腸手陽明經病證第八

腎足少陰經病證第九

膀胱足太陽經病證第十

三焦手少陽經病證第十一

肝足厥陰經病證第一

肝氣虛則恐實則怒肝氣虛則夢見園苑生草得其時
則夢伏樹下不敢起肝氣盛則夢怒厥氣客於肝則夢
山林樹木

病在肝平旦慧下晡甚夜半靜

病先發於肝者頭目眩脇痛支滿一日之脾閉塞不通

身痛體重二日之胃而腹脹三日之腎少腹腰脊痛脛
痠十日不已死冬日入夏早食

肝脈搏堅而長色不青當病墜墮若搏因血在脇下令

人喘逆若奭而散其色澤者當病溢飲溢飲者渴暴多

飲而溢

一作易

入肌皮腸胃之外也肝脈沈之而急浮之

亦然若脇下痛有氣支滿引少腹而痛時小便難苦目
眩頭痛腰背痛足爲逆寒時癢女人月信不來時無時
有得之少時有所墜墮

青脈之至也長而左右彈診曰有積氣在心下支胛名

曰肝痺得之寒濕與疝同法腰痛足清頭痛

肝中風者頭目暈兩脇痛行常偃令人嗜甘如阻婦狀

肝中寒者其人洗洗惡寒翕翕發熱面翕然赤繫繫有

汗胸中煩熱肝中寒者其人兩臂不舉舌本又作大燥善

太息胸中痛不得轉側時時盜汗欬食已吐其汁

肝主胸中喘怒罵其脈沈胃中必窒欲令人推按之有

熱鼻窒

凡有所墜墮惡血畱內若有所大怒氣上而不能下積

於左脇下則傷肝肝傷者其人脫肉又卧口欲得張時

時手足青目暝瞳人痛此爲肝藏傷所致也

肝脹者脇下滿而痛引少腹肝水者其人腹大不能自

轉側而脇下腹中痛時時津液微生小便續通

肺乘肝卽爲癰腫心乘肝必吐利

肝著者其病人常欲蹈其胷上先未苦時但欲飲熱

袁校

云疑有
關文

肝之積名曰肥氣在左脇下如覆盃有頭足如龜鼈狀

久久不愈發欬逆痰瘧連歲月不已以季夏戊巳日得

之何也肺病傳肝肝當傳脾脾適以季夏王王者不受

邪肝復欲還肺肺不肯受因畱結爲積故知肥氣以季夏得之

肝病其色青手足拘急脇下苦滿或時眩冒其脈弦長此爲可治宜服防風竹瀝湯秦艽散春當刺大敦夏刺行間冬刺曲泉皆補之季夏刺太衝秋刺中郄皆瀉之又當灸期門百壯背第九椎五十壯

肝病者必兩脇下痛引小腹令人善怒虛則目眈眈無所見耳無所聞善恐如人將捕之若欲治之當取其經足厥陰與少陽氣逆則頭目痛耳聾不聰頰腫取血者

袁校云血者謂有血之穴

邪在肝則兩脇中痛寒中惡血在內脘善瘕節時

案時泰定

本作肘考千金方肝脈論作時腫取之行間以引脇下補三里以溫胃

中取血脈以散惡血取耳間青脈以去其瘕

足厥陰之脈起於大指羸毛之際上循足趺上廉去內

踝一寸上踝八寸交出太陰之後上膈內廉循股陰入

毛中環陰氣案當作器抵少腹俠胃屬肝絡膽上貫膈布脇

肋循喉嚨之後上入頰頰連目系上出額與督脈會於

巔其支者從目系下頰裏環脣內其支者復從肝別貫

革案居敬本作膈千金方肝藏脈論亦作膈上注肺中是動則病腰痛不可

以俛仰丈夫癩疝婦人少腹腫甚則噤乾面塵脫色是主肝所生病者胸滿嘔逆洞泄狐疝遺溺閉癰盛者則寸口大一倍於人迎虛者則寸口反小於人迎也

足厥陰之別名曰蠡溝去內踝上五寸別走少陽其別者循經上臑結於莖其病氣逆則臑腫卒疝實則挺長熱虛則暴癢取之所別

肝病胸滿脇脹善恚怒叫呼身體有熱而復惡寒四肢不舉面目白身體滑其脈當弦長而急今反短濇其色

當青而反白者此是金之尅木爲大逆十死不治

膽足少陽經病證第二

膽病者善太息口苦嘔宿汁心澹澹恐如人將捕之噤
中介介然數唾候在足少陽之本末亦見其脈之陷下

者灸之其寒熱刺陽陵泉善嘔有苦汁長太息心中澹

澹善悲恐如人將捕之邪在膽逆在胃膽溢

案居敬本作液則

口苦胃氣逆則嘔苦汁故曰嘔膽刺三里以下胃氣逆
刺足少陽血絡以閉膽卻調其虛實以去其邪也

膽脹者脇下痛脹口苦太息

厥氣客於膽則夢鬪訟

足少陽之脈起於目兌眚上抵頭角下耳後循頸行手
少陽之脈前至肩上卻交手少陽之後入缺盆其支者
從耳後入耳中出走耳前至兌眚後其支者別兌眚下
大迎合手少陽於頤一本云別兌眚上迎手少陽於巔下加頰車下頸
合缺盆以下胸中貫膈絡肝屬膽循脇裏出氣街遶毛
際橫入髀厭中其直者從缺盆下腋循胸中過季脇下
合髀厭中以下循髀陽出膝外廉下外輔骨之前直下
抵絕骨之端下出外踝之前循足趺上出小指次指之

端其支者趺上入大指之間循大指歧內出其端還貫
入爪甲出三毛是動則病口苦善太息心脇痛不能反
側甚則面微塵體無膏澤足外反熱是爲陽厥是主骨
所生病者頭痛角案袁校本
作頭角痛額痛目兌背痛缺盆中腫
痛腋下腫痛馬刀挾瘦汗出振寒瘡胸中脇肋髀膝外
至脢絕骨外踝前及諸節皆痛小指次指不用盛者則
人迎大一倍於寸口虛者則人迎反小於寸口也

心手少陰經病證第三

心氣虛則悲不已實則笑不休心氣虛則夢救火傷物

得其時則夢燔灼心氣盛則夢喜笑及恐畏厥氣客於

心則夢兵

案兵秦定本作邱千金作邱山

烟火

病在心日中慧夜半甚平旦靜

病先發於心者心痛一日之肺喘欬三日之肝脇痛支
滿五日之脾閉塞不通身痛體重三日不已死冬夜半
夏日中

心脈搏堅而長當病舌卷不能言其爽而散者當病消
渴自己心脈沈之小而緊浮之不喘苦心下聚氣而痛
食不下喜咽唾時手足熱煩滿時忘不樂喜太息得之

憂思

赤脈之至也喘而堅診曰有積氣在中時害於食名曰心痺得之外疾思慮而心虛故邪從之

心脈急名曰心疝小腹當有形其以心為牡藏小腸為之使故小腹當有形

邪哭使魂魄不安者血氣少也血氣少者屬於心心氣

虛者其人即畏

衰一作

合目欲眠夢遠行而精神離散魂

魄妄行陰氣衰者即為癩陽氣衰者即為狂五藏者魂魄之宅舍精神之所依託也魂魄飛揚者其五藏空虛

也卽邪神居之神靈所使鬼而下之脈短而微其藏不足則魂魄不安魂屬於肝魄屬於肺肺主津液卽爲涕泣肺氣衰者卽爲泣出肝氣衰者魂不安肝主善怒其聲呼

心中風者翕翕發熱不能起心中飢而欲食食則嘔心中寒者其人病心如噉蒜狀劇者心痛徹背背痛徹心如蟲注其脈浮者自吐乃愈

愁憂思慮則傷心心傷則苦驚喜忘善怒心傷者其人勞倦卽頭面赤而下重心中痛徹背自發煩熱

案千金方作自

煩發

當臍跳

案秦定居敬本作挑千金方作跳

手其脈弦此為心藏傷

所致也

心脹者煩心短氣卧不安

心水者其人身體重

一作腫

而少氣不得卧煩而躁其陰

大腫

腎乘心必癢

真心痛手足青至節心痛甚旦發夕死夕發旦死

心腹痛懊懣發作腫聚往來上下行痛有休作心腹中

熱苦渴涎出是虻咬也以手聚而堅持之毋令得移以

月經 卷六
大針刺之久持之蟲不動乃出針腸中有蟲虻咬皆不可取以小針

心之積名曰伏梁起於臍上上至心大如臂久久不愈病煩心心痛以秋庚辛日得之何也腎病傳心心當傳肺肺適以秋王王者不受邪心復欲還腎腎不肯受因畱結爲積故知伏梁以秋得之

心病其色赤心痛短氣手掌煩熱或啼笑罵詈悲思愁慮面赤身熱其脈實大而數此爲可治春當刺中衝夏刺勞宮季夏刺太陵皆補之秋刺間使冬刺曲澤皆瀉

之此是手厥陰心包絡經

又當灸巨闕五十壯背第五椎百壯

心病者胸內痛脇支滿兩脇下痛膺背肩甲間痛兩臂

內痛虛則胸腹大脇下與腰背相引而痛取其經手少

陰太陽舌下血者其變病刺郄中血者

邪在心則病心痛善悲時眩仆視有餘不足而調其輸

案諸本作調之其輸于金方心臟脈論作調其輸從之靈樞云所注為輸注灌注也輸輸運也言脈注於此而輸於彼也史記扁鵲傳五藏之輸注十二經皆以輸為原蓋經穴也是輸古通作輸又作俞

黃帝曰手少陰之脈獨無輸

案無治病之俞穴

何也岐伯曰少

陰者心脈也心者五臟六腑之大主也心為帝王精神

之所舍其藏堅固邪不能客客之則傷心心傷則神去
神去則身死矣故諸邪在於心者皆心之包絡包絡也
者心主之脈也故少陰無輸焉少陰無輸心不病乎對
曰其外經腑病藏不病故獨取其經於掌後兌骨之端
也

手心主之脈起於胸中出屬心包下膈歷絡三焦其支
者循胸出脇下腋三寸上抵腋下循臍內行太陰少陰
之間入肘中下臂行兩筋之間入掌中循中指出其端
其支者別掌中循小指次指出其端是動則病手心熱

肘臂攣急腋腫甚則胸脇支滿心中澹澹大動面赤目黃善笑不休是主脈所生病者煩心心痛掌中熱盛者則寸口大一倍於人迎虛則寸口反小於人迎也

手心主之別名曰內關去腕二寸出於兩筋間循經以上繫於心包絡心系氣實則心痛虛則爲煩心取之兩筋間

心病煩悶少氣大熱熱上盪心嘔吐欬逆狂語汗出如珠身體厥冷其脈當浮今反沈濡而滑其色當赤而反黑者此是水之剋火爲大逆十死不治

小腸手太陽經病證第四

小腸病者小腹痛腰背控舉而痛時窘乏復耳前熱若寒甚獨肩上熱及手小指次指之間熱若脈陷者此其候也

小腹控舉引腰脊上衝心邪在小腸者連舉系屬於脊貫肝肺絡心系氣盛則厥逆上衝腸胃動肝肺散於盲結於厥一作齊案千金方作臍故取之盲原以散之刺太陰以與之取厥陰以下之取巨虛下廉以去之按其所過之經以調之

小腸有寒其人下重便膿血有熱必痔小腸有宿食常
暮發熱明日復止小腸脹者小腹臘脹引腹而痛

厥氣客於小腸則夢聚邑街衢

手太陽之脈起於小指之端循手外側上腕出踝中直
上循臂骨下廉出肘內側兩骨之間上循臘外後廉出
肩解繞肩甲交肩入缺盆向腋絡心循咽下膈抵胃
屬小腸其支者從缺盆循頸上頰至目兌眚卻入耳中
其支者別頰上頤抵鼻至目內眚斜絡於顴是動則病
嗌痛頰腫不可以顧肩似拔臘似折是主液所生病者

耳聾目黃頰頰腫頸肩臑肘臂外後廉痛盛者則人迎
大再倍於寸口虛者則人迎反小於寸口也

脾足太陰經病證第五

脾氣虛則四肢不用五臟不安實則腹脹溼洩不利脾
氣虛則夢飲食不足得其時則夢築垣蓋屋脾氣盛則
夢歌樂體重手足不舉厥氣客於脾則夢邱陵大澤壤
屋風雨

病在脾日昞慧平旦甚日中持下晡靜

病先發於脾閉塞不通身痛體重一日之胃而腹脹二

日之腎小腹腰脊痛脛痠三日之膀胱背脇筋痛小便
閉十日不已死冬人定夏宴食

脾脈搏堅而長其色黃當病少氣其奕而散色不澤者
當病足胛腫若水狀

脾脈沈之而濡浮之而虛苦腹脹煩滿胃中有熱不嗜
食食而不化大便難四肢苦痺時不仁得之房內月使
不來來而頻併

黃脈之至也大而虛有積氣在腹中有厥氣名曰厥疝
女子同法得之疾使四肢汗出當風

寸口脈弦而滑弦則爲痛滑則爲實痛卽爲急實卽爲
踊痛踊相搏卽胸脇搶急

跌陽脈浮而澀浮卽胃氣微澀卽脾氣衰微衰相搏卽
呼吸不得此爲脾家失度

寸口脈雙緊卽爲入其氣不出無表有裏心下痞堅

跌陽脈微而澀微卽無胃氣澀卽傷脾寒在於膈而反
下之寒積不消胃微脾傷穀氣不行食已自噫寒在胸
膈上虛下實穀氣不通爲祕塞之病

寸口脈緩而遲緩則爲陽衛氣長遲則爲陰榮氣促榮

衛俱和剛柔相得三焦相承其氣必強

跌陽脈滑而緊滑卽胃氣實緊卽脾氣傷得食而不消者此脾不治也能食而腹不滿此爲胃氣有餘腹滿而不能食心下如飢此爲胃氣不足心氣虛也得食而滿者此爲脾家不治

脾中風者翕翕發熱形如醉人腹中煩重皮肉瞶瞶而短氣也

凡有所擊朴若醉飽入房汗出當風則傷脾脾傷則中氣陰陽離別陽不從陰故以三分候死生

脾氣弱病利下白腸垢大便堅不能更衣汗出不止名曰脾氣弱或五液注下青黃赤白黑

病人鼻下平者胃病也微赤者病發癰微黑者有熱青

者有寒白者不治唇黑者胃先病微燥而渴者可治不

渴者不可治臍反出者此為脾先落

一云先終

脾脹者善噦四肢急體重不能衣

一作枚案枚疑收字之譌

脾水者其人腹大四肢苦重津液不生但苦少氣小便

難

跌陽脈浮而澀浮則胃氣強澀則小便數浮澀相搏大

渴
便則堅其脾爲約脾約者其人大便堅小便利而反不

凡人病脈已解而反暮微煩者人見病者差安而強與
穀脾胃氣尙弱不能消穀故令微煩損穀則愈

脾之積名曰痞氣在胃脘覆大如盤久久不愈病四肢
不收黃瘡食飲不爲飢膚以冬壬癸日得之何也肝病
傳脾脾當傳腎腎適以冬壬壬者不受邪脾復欲還肝
肝不肯受因留結爲積故知痞氣以冬得之

脾病其色黃飲食不消腹苦脹滿體重節痛大便不利

其脈微緩而長此為可治宜服平胃丸瀉脾丸茱萸丸
 附子湯春當刺隱白冬刺陰陵泉皆瀉之夏刺大都季
 夏刺公孫秋刺商邱皆補之又當灸章門五十壯背第
 十一椎百壯

脾病者必身重苦飢足痿不收素問作善飢肉痿足不收疝善瘦腳

下痛虛則腹脹腸鳴溏泄食不化取其經足太陰陽明

少陰血者

邪在脾則飢肉痛陽氣有餘陰氣不足則熱中善飢陽
 氣不足陰氣有餘則寒中腸鳴腹痛陰陽俱有餘若俱

不足則有寒有熱皆調其三里

足太陰之脈起於大指之端循指內側白肉際過核骨
後上內踝前廉上膈內循肱骨後交出厥陰之前上循
膝股內前廉入腹屬脾絡胃上膈俠咽連舌本散舌下
其支者復從胃別上膈注心中是動則病舌本強食則

嘔吐

一作胃管痛腹脹善噫得後與氣則快然而食

案泰定居

敬本作衰

身體皆重是主脾有生病者舌本痛體不能動搖

食不下煩心心下急痛寒瘧瘡痕泄水閉黃疸好卧不
能食肉脣青強立股膝內痛厥足大指不用盛者則寸

別經 卷六
口大三倍於人迎虛者則寸口反小於人迎也

足太陰之別名曰公孫去本節後一寸別走陽明其別者入絡腸胃厥氣上逆則霍亂實則腹中切痛虛則鼓脹取之所別

脾病其色黃體青失溲直視脣反張爪甲青飲食吐逆體重節痛四肢不舉其脈當浮大而緩今反弦急其色當黃今反青此是木之剋土爲大逆十死不治

胃足陽明經病證第六

胃病者腹脹胃脘當心而痛上支兩脇膈咽不通飲食

不下取三里

飲食不下膈塞不通邪在胃腕在上腕則抑而刺之在下腕則散而去之

胃脈搏堅而長其色赤當病折髀其奕而散者當病食痺髀痛胃中有癖食冷物者痛不能食食熱則能食胃脹者腹滿胃腕痛鼻聞焦臭妨於食大便難

診得胃脈病形何如曰胃實則脹虛則洩

病先發於胃脹滿五日之腎少腹腰脊痛脛痠三日之膀胱背脰筋痛小便痛五日上之脾閉塞不通身痛體

重靈樞云

六日不已死冬夜半後夏日昃

六日一作三日

脈浮而芤浮則爲陽芤則爲陰浮芤相搏胃氣生熱其陽則絕

跌陽脈浮者胃氣虛也跌陽脈浮大者此胃家微虛煩
圍必日再行芤而有胃氣者脈浮之大而奕微按之芤
故知芤而有胃氣也跌陽脈數者胃中有熱卽消穀引
食跌陽脈濇者胃中有寒水穀不化跌陽脈麤麤而浮
者其病難治跌陽脈浮遲者故久病跌陽脈虛則遺溺
實則失氣

動作頭痛重熱氣朝者屬胃

厥氣客於胃則夢飲食

足陽明之脈起於鼻交頰中旁約太陽之脈下循鼻外
入上齒中還出俠口環脣下交承漿卻循頤後下廉出
大迎循頰車上耳前過客主人循髮際至額顙其支者
從大迎前下人迎循喉嚨入缺盆下膈屬胃絡脾其直
者從缺盆下乳內廉下俠臍入氣街中其支者起胃下
口循腹裏下至氣街中而合以下髀關抵伏菟下入膝
臏中下循胫外廉下足跗入中指內間其支者下膝三

寸而別以下入中指外間其支者別跗上入大指間出

其端是動則病悽悽然振寒善伸數欠顏黑病至則惡

人與火聞木音則惕然而驚心動欲獨閉戶牖而處甚

則欲上高而歌棄衣而走賁響腹脹是為𦵑一作𦵑厥是

主血一作胃所生病者狂瘧一作瘧温淫汗出𦵑𦵑口喎唇

緊頸腫喉痺大腹水腫膝臄痛循膺乳街股伏菟𦵑外

廉足跗上者痛中指不用氣盛則身以前皆熱其有餘

於胃則消穀善飢溺色黃氣不足則身以前皆寒慄胃

中寒則脹滿盛者則人迎大三倍於寸口虛者則人迎

反小於寸口也

肺手太陰經病證第七

肺氣虛則鼻息利

案靈樞作鼻塞不利

少氣實則喘喝

案張介賓類經注云

喘喝者氣促聲麤也

胸憑

案靈樞作胸盈介賓注胸盈者脹滿也

仰息肺氣虛則夢

見白物見人斬血藉藉得其時則夢見兵戰肺氣盛則

夢恐懼哭泣厥氣客於肺則飛揚見金鐵之器奇物

病在肺下晡慧日中甚夜半靜

病先發於肺喘咳三日之肝脇痛支滿一日之脾閉塞

不通身體痛重五日之胃腹脹十日不已死冬日入夏

日出

肺脈搏堅而長當病吐血其濡而散者當病漏汗

漏一作灌

至今不復散發

袁校云六字疑衍

肺脈沈之而數浮之而喘

袁校

云疑

苦洗洗寒熱腹滿腸中熱

袁校云肺以大腸為腑

小便赤肩

背痛從腰已上汗出得之房內汗出當風

白脈之至也喘

疑作濡

而浮大上虛下實驚有積氣在胸

中喘而虛名曰肺痺寒熱得之因醉而使內也

肺中風者口燥而喘身運而重冒

案泰定本作胃千金方作冒

而腫

脹肺中寒者其人吐濁涕

形寒寒飲則傷肺以其兩寒相感中外皆傷故氣逆而

上行肺傷者其人勞倦則欬唾血其脈細緊浮數皆吐

血此爲操

案操當爲躁

擾嗔怒得之肺傷氣擁所致

肺脹者虛而滿喘欬逆倚息目如脫狀其脈浮

肺水者其人身體重而小便難時時大便鴨溇

肝乘肺必作虛滿

脈奕而弱弱反在關奕反在顛浮反在上弱反在下浮

則爲陽弱則血不足必弱爲虛浮弱自別浮則自出弱

則爲入浮則爲出不入此爲有表無裏弱則爲入不出

此為無表有裏陽出極汗齊腰而還此為無表有裏故名曰厥陽在當汗出不汗出

跌陽

案千金方肺藏脈論作太陽

脈浮緩少陽微緊微為血虛緊為

微寒此為鼠乳其病屬肺

肺之積名曰息賁在右脇下覆大如盂久久不愈病洒洒寒熱氣逆喘欬發肺癰以春甲乙日得之何也心病傳肺肺當傳肝肝適以春王王者不受邪肺復欲還心不肯受因留結為積故知息賁以春得之

肺病其色白身體但寒無熱時時欬其脈微遲為可治

宜服五味子大補肺湯瀉肺散春當刺少商夏刺魚際
皆瀉之季夏刺大淵秋刺經渠冬刺尺澤皆補之又當
灸臙中百壯背第三椎二十五壯

肺病者必喘欬逆氣肩息背痛汗出尻陰股膝攣髀臑
胫足皆痛虛則少氣不能報息耳聾啞乾取其經手太
陰足太陽之外厥陰內少陰血者

邪在肺則皮膚痛發寒熱上氣氣喘汗出欬動肩背取
之膺中外輸背第三椎之傍以手痛案痛當
作重按之快然

乃刺之取之缺盆中以越之

手太陰之脈起於中焦下絡大腸還循胃口上膈屬肺
從肺系橫出腋腋下循臑內行少陰心主之前下循臂
內上骨下廉入寸口上魚循魚際出大指之端其支者
從腕後直次指內廉出其端是動則病肺脹滿膨膨而
喘欬缺盆中痛甚則交兩手而瞀是爲臂厥是主肺所
生病者欬上氣喘喝煩心胸滿臑臂內前廉痛掌中熱
氣盛有餘則肩背痛風汗出小便數而欠氣虛則肩背
痛寒少氣不足以息溺色變卒遺失

案當爲
矢之譌

無度盛者

則寸口大三倍於人迎虛者則寸口反小於人迎也

手太陰之別名曰列缺起於腋下一云腕上案手太陰之絡名列缺在腕後

一寸五分分間案上側分肉間別走陽明其別者並太陰之經直入

掌中散入於魚際其實案靈樞云病實則手銳掌起案靈樞云掌熱虛

則欠欬案張介賓靈樞經脈篇注云欠欬張口伸腰也體倦則申志倦則欬居敬本作欬誤小便

遺數取之去腕一寸半

肺病身當有熱欬嗽短氣唾出膿血其脈當短濇今反浮大其色當白而反赤者此是火之剋金為大逆十死不治

大腸手陽明經病證第八

大腸病者腸中切痛而鳴濯濯冬日重感於寒則泄當
臍而痛不能久立與胃同候取巨虛上廉腸中雷鳴氣
上衝胸喘不能久立邪在大腸刺盲之原巨虛上廉三
里

大腸有寒鶩溏有熱便腸垢大腸有宿食寒慄發熱有
時如瘧狀大腸脹者腸鳴而痛寒則泄食不化

厥氣客於大腸則夢田野

手陽明之脈起於大指次指之端外側循指上廉出合
谷兩骨之間上入兩筋之中循臂上廉上入肘外廉循

膈外前廉上肩出髃骨之前廉上出柱骨之會上下入
缺盆絡肺下膈屬大腸其支者從缺盆直入上頸貫頰
入下同縫中還出俠口交人中左之右右之左上俠鼻
孔是動則病齒痛頸腫是主津所生病者目黃口乾鼻
衄喉痺肩前膈痛大指次指痛不用氣盛有餘則當脈
所過者熱腫虛則寒慄不復盛者則人迎大三倍於寸
口虛者則人迎反小於寸口也

腎足少陰經病證第九

腎氣虛則厥逆實則脹滿四肢正黑腎氣虛則夢見舟

船溺人得其時夢伏水中若有畏怖腎氣盛則夢腰脊
兩解不相屬厥氣客於腎則夢臨淵沒居水中

病在腎夜半慧日乘四季甚下晡靜

病先發於腎小腹腰脊痛脛痠三日之膀胱背脇筋痛
小便閉二日上之心心痛三日之小腸脹四日不已死

冬大食

案食爲晨
字之譌

夏晏晡

腎脈搏堅而長其色黃而赤當病折腰其爽而散者當
病少血腎脈沈之大而堅浮之大而緊苦手足骨腫厥
而陰不興腰脊痛小腹腫心下有水氣時脹閉時泄得

之浴水中身未乾而合房內及勞倦發之

黑脈之至也上堅而大有積氣在小腹與陰名曰腎痺
得之沐浴清水而卧

凡有所用力舉重若入房過度汗出如浴水則傷腎

腎脹者腹滿引背央央然腰髀痛腎水者其人腹大臍
腫痛重痛不得溺陰下濕如牛鼻頭汗其足逆寒大便
反堅

腎著之爲病從腰以下冷腰重如帶五千錢腎著之病

其人身體重腰中冷如冰狀

一作如水洗狀一作如坐水中形如水狀

反不

渴小便自利食飲如故是其證也病屬下焦從身勞汗出衣裏冷濕故久久得之

腎之積名曰奔豚發於小腹上至心下如豚奔走之狀上下無時久久不愈病喘逆骨痿少氣以夏丙丁日得之何也脾病傳腎腎當傳心心適以夏王者不受邪腎復以還脾脾不肯受因留結爲積故知奔豚以夏得之

水流夜疾何以故師曰土休故流疾而有聲人亦應之人夜卧則脾不動搖脈爲之數疾也

腎病其色黑其氣虛弱吸吸少氣兩耳苦聾腰痛時時
失精飲食減少膝以下清其脈沈滑而遲此爲可治宜
服內補散建中湯腎氣丸地黄煎春當刺湧泉秋刺伏
留冬刺陰谷皆補之夏刺然谷季夏刺大谿皆瀉之又
當灸京門五十壯背第十四椎百壯

腎病者必腹大脛腫痛喘欬身重寢汗出憎風虛卽胸
中痛大腹小腹痛清厥意不樂取其經足少陰太陽血
者

邪在腎則骨痛陰痺陰痺者按之而不得腹脹腰痛大

便難肩背頸項強痛時眩取之湧泉崑崙視有血者盡取之

足少陰之脈起於小指之下斜趣足心出然骨之下循內踝之後別入跟中以上臑內出臑中內廉上股內後廉貫脊屬腎絡膀胱其直者從腎上貫肝膈入肺中循喉嚨俠舌本其支者從肺出絡心注胸中是動則病飢而不欲食面黑如炭色一作地色欬唾則有血喉鳴而喘坐而欲起目眈眈無所見心懸若飢狀氣不足則善恐心惕惕若人將捕之是為腎厥一作痿是主腎所生病者口

熱舌乾咽腫上氣噎乾及痛煩心心痛黃疸腸澼脊股
內後廉痛痿厥嗜卧足下熱而痛灸則強食而生害一作
肉緩帶被髮大杖重履而步盛者則寸口大再倍於人
迎虛者則寸口反小於人迎也

足少陰之別名曰大鍾當踝後繞跟別走太陽其別者
並經上走於心包下貫腰脊其病氣逆則煩悶實則閉
癰虛則腰痛取之所別

腎病手足逆冷面赤目黃小便不禁骨節煩痛小腹結
痛氣衝於心其脈當沈細而滑今反浮大其色當黑而

反黃此是土之剋水爲大逆十死不治

膀胱足太陽經病證第十

膀胱病者小腹偏腫而痛以手按之則欲小便而不得
肩上熱若脈陷足小指外側及脛踝後皆熱若脈陷者
取委中

膀胱脹者小腹滿而氣癢

病先發於膀胱者背脇筋痛小便閉五日之腎小腹腰
脊痛脛痠一日之小腸脹一日之脾閉塞不通身痛體
重二日不已死冬雞鳴夏下晡

一云日夕

厥氣客於膀胱則夢遊行

足太陽之脈起於目內眥上額交巔上其支者從巔至
耳上角其直者從巔入絡腦還出別下項循肩膊內俠
脊抵腰中入循膂絡腎屬膀胱其支者從腰中下會於
後陰下貫臀入膈中其支者從膈內左右別下貫髓一作

腫案千金方作腫
居敬本作肺誤

過髀樞循髀外後廉下合膈中以下

貫膈內出外踝之後循京骨至小指外側是動則病衝
頭痛目似脫項似拔脊痛腰似折髀不可以曲膈如結
膈如裂是爲踝厥是主筋所生病者痔瘡狂癲疾頭腦

頂痛目黃淚出歔衄項背腰尻臑膻腳皆痛小指不用
盛者則人迎大再倍於寸口虛者則人迎反小於寸口
也

三焦手少陽經病證第十一

三焦病者腹脹氣滿小腹尤堅不得小便窘急溢則爲
水留則爲脹候在足太陽之外大絡在太陽少陽之間
亦見於脈取委陽少腹病腫不得小便邪在三焦約取
太陽大絡視其結脈與厥陰小絡結而血者腫上及胃
管取三里

三焦脹者氣滿於皮膚殼殼然而堅不疼

熱在上焦因欬爲肺痿熱在中焦因腹堅熱在下焦因
溺血

手少陽之脈起於小指次指之端上出兩指之間循手
表腕出臂外兩骨之間上貫肘循臑外上肩而交出足
少陽之後入缺盆交膻中散絡心包下膈徧屬三焦其
支者從膻中上出缺盆上項俠耳後直上出耳上角以
屈下額一作頰至頤其支者從耳後入耳中出走耳前過

客主人前交頰至目兌背是動則病耳聾輝輝案靈樞
作渾渾

不明也 焮焮隘腫喉痺是主氣所生病者汗出目兌皆痛
頰腫耳後肩臑肘臂外皆痛小指次指不用盛者則人
迎大一倍於寸口虛者則人迎反小於寸口也

脈經卷七

病不可發汗證第一

病可發汗證第二

病發汗以後證第三

病不可吐證第四

病可吐證第五

病不可下證第六

病可下證第七

病發汗吐下以後證第八

病可溫證第九

病不可灸證第十

病可灸證第十一

病不可刺證第十二

病可刺證第十三

病不可水證第十四

病可水證第十五

病不可火證第十六

病可火證第十七

熱病陰陽交并少陰厥逆陰陽竭盡生死證第十

八

重實重虛陰陽相附生死證第十九

熱病生死期日證第二十

熱病十逆死日證第二十一

熱病五藏氣絕死日證第二十二

熱病至脈死日證第二十三

熱病損脈死日證第二十四

熱病不可發汗證第一

少陰病脈細沈數病為在裏不可發其汗

脈浮而緊法當身體疼痛當以汗解假令尺中脈遲者

不可發其汗何以故然此為榮氣不足血微少故也

少陰病脈微一作濡而微弱不可發其汗無陽故也

脈濡而弱弱反在關濡反在巔微反在上澀反在下微

則陽氣不足澀則無血陽氣反微中風汗出而反躁煩

澀則無血厥而且寒陽微發汗躁不得眠

動氣在右不可發汗發汗則衄而渴心苦煩飲即吐水

動氣在左不可發汗發汗則頭眩汗不止筋惕肉瞤

動氣在上不可發汗發汗則氣上衝正在心端

動氣在下不可發汗發汗則無汗心中大煩骨節苦疼

目運惡寒食即反吐穀不得前

一云穀不消化

咽中閉塞不可發汗發汗則吐血氣微絕手足逆冷欲

得踰卧不能自温

諸脈數動微弱並不可發汗發汗則大便難腹中乾

小便難胃燥而煩

脈濡而弱弱反在關濡乃在巔弦反在上微反在下弦

為陽運微為陰寒上實下虛意欲得温微弦為虛不可

發汗發汗則寒慄不能自還欬者則劇數吐涎沫咽中
必乾小便不利心中飢煩晬時而發其形似瘧有寒無
熱虛而寒慄欬而發汗踈而苦滿滿一作心痛腹中復堅
厥不可發汗發汗則聲亂咽嘶舌痿穀不得前諸逆發
汗微者難愈劇者言亂睛眩者死命將難全

太陽病得之八九日如瘧狀發熱而惡寒熱多寒少其

人不嘔清便續

案續居敬本同泰定本袁校本作純

自下

案泰定本居一敬本作可

日再三發其脈微而惡寒此為陰陽俱虛不可復發汗

也

太陽病發熱惡寒熱多寒少脈微弱則無陽也不可復發其汗

咽乾燥者不可發汗

亡血家不可攻其表汗出則寒慄而振

衄家不可攻其表汗出必額陷脈上促急而緊直視而不能眴不得眠

汗家重發其汗必恍惚心亂小便已陰疼可與禹餘糧丸

淋家不可發汗發其汗必便血

瘡家雖有身疼不可攻其表汗出自瘡

一作瘡下同

冬時發其汗必吐利口中爛生瘡

下利清穀不可攻其表汗出必脹滿

欬而小便利若失小便不可攻其表汗出則厥逆冷汗

出多堅

案堅泰定居敬本作極

發其汗亦堅

傷寒一二日至四五日厥者必發熱前厥者後必熱厥

深者熱亦深厥微者熱亦微厥應下之而反發其汗必

口傷爛赤

病人脈數數為有熱當消穀引食反吐者醫發其汗陽

微膈氣虛脈則爲數數爲客陽不能消穀胃中虛冷故
令吐也

傷寒四五日其脈沈煩而喘滿脈沈者病爲在裏反發
其汗津液越出大便爲難表虛裏實久則譫語

傷寒頭痛翕翕發熱形象中風常微汗出又自嘔者下
之益煩心懊懺如飢發汗則致瘥身強難以屈伸熏之
則發黃不得小便久則發欬唾

太陽病發其汗因致瘥

傷寒脈弦細頭痛而反發熱此屬少陽少陽不可發其

汗

太陽與少陽併病頭項強痛或眩暈時如結胸心下痞堅者不可發其汗

少陰病欬而下利譫語者此被火氣劫故也小便必難以強責少陰汗

少陰病但厥無汗而強發之必動其血未知從何道出或從口鼻或從目出者是爲下厥上竭爲難治

傷寒有五皆熱病之類也其形相象根本異源同病異名同脈異經病雖俱傷於風其人自有痼疾則不得同

法其人素傷於風因復傷於熱風熱相薰

則發風温四

肢不收頭痛發熱常汗出不解治在少陰

以陰不可發

汗汗出譫語獨語內煩躁擾不得卧善驚

曰亂無精治

之復發其汗如此者醫殺之也

傷寒濕温其人常傷於濕因而中暍濕熱相薄則發濕

温病苦兩脛逆冷腹滿又胸頭目痛苦妄言治在足太

陰不可發汗汗出必不能言耳聾不知痛所在身青面

色變名曰重暍如此者醫殺之也

右二一首
出岐四律

病可發汗證第二

大法春夏宜發汗

凡發汗欲令手足皆周至熱熱一時間益佳但不欲如水流離若病不解當重發汗汗多則亡陽陽虛不得重發汗也

凡服湯藥發汗中病便止不必盡劑也

凡云可發汗而無湯者丸散亦可用要以汗出爲解然不如湯隨證良

太陽病外證未解其脈浮弱當以汗解宜桂枝湯

太陽病脈浮而數者可發其汗屬桂枝湯

陽明病脈遲汗出多微惡寒表未解可發其汗屬桂枝湯

夫病脈浮大問病者言便堅即設利者為虛大逆堅為實汗出而解何以故脈浮當以汗解

傷寒其脈不弦緊而弱弱者必渴被火必譫語弱者發熱脈浮者解之當汗出愈

病者煩熱汗出即解復如瘡狀日晡所發熱此屬陽明脈浮虛者當發其汗屬桂枝湯

病常自汗出此為榮氣和榮氣和而外不解此衛不和

也榮行脈中爲陰主內衛行脈外爲陽主外復發其汗
衛和則愈屬桂枝湯

病人藏無他病時發熱自汗出而不愈此衛氣不和也
先其時發汗則愈屬桂枝湯

脈浮而緊浮則爲風緊則爲寒風則傷衛寒則傷榮榮
衛俱病骨節煩疼可發其汗宜麻黃湯

太陽病不解熱結膀胱其人如狂血必下下者卽愈
其外未解者尙未可攻當先解其外屬桂枝湯

太陽病下之微喘者表未解故也屬桂枝加厚樸杏子

湯

傷寒病脈浮緊不發其汗因衄屬麻黃湯

陽明病脈浮無汗其人必喘發其汗則愈屬麻黃湯

太陽病脈浮者可發其汗屬桂枝湯

太陽病脈浮緊無汗而發熱其身疼痛八九日不解表
候續在此當發其汗服湯微除發煩目瞑劇者必衄衄
乃解所以然者陽氣重故也屬麻黃湯

脈浮者病在表可發其汗屬桂枝湯

一云麻黃湯

傷寒不大便六七日頭痛有熱與承氣湯其大便反青

一作小
便清
此為不在裏故在表也當發其汗頭痛者必衄

屬桂枝湯

下利後身體疼痛清便自調急當救表宜桂枝湯

太陽病頭痛發熱汗出惡風若惡寒屬桂枝湯

太陽中風陽浮而陰濡弱者熱自發濡弱者汗自出

嗇嗇惡寒淅淅惡風翕翕發熱鼻鳴乾嘔屬桂枝湯

太陽病發熱汗出此為榮弱衛強故使汗出欲救邪風

屬桂枝湯

太陽病下之氣上撞可與桂枝湯不撞不可與之

太陽病初服桂枝湯而反煩不解者法當先刺風池風
府卻與桂枝湯則愈

燒針令其汗針處被寒核起而赤者必發賁豚氣從少
腹上撞心者灸其核上一壯與桂枝加桂湯

太陽病項背強几几反汗出惡風屬桂枝加葛根湯

太陽病項背強几几無汗惡風屬葛根湯

太陽與陽明合病而自利不嘔吐屬葛根湯

太陽與陽明合病不下利但嘔屬葛根加半夏湯

太陽病桂枝證醫反下之遂利不止其脈促者表未解

喘而汗出屬葛根黃芩黃連湯

太陽病頭痛發熱身體疼腰痛骨節疼痛惡風無汗而

喘屬麻黃湯

太陽與陽明合病喘而胸滿不可下也屬麻黃湯

太陽中風脈浮緊發熱惡寒身體疼痛不汗出而煩躁

頭痛屬大青龍湯脈微熱汗出惡風不可服之服之則

厥筋惕肉瞤此爲逆也

傷寒脈浮緩其身不疼但重乍有輕時無少陰證者大

青龍湯發之

傷寒表不解心下有水氣乾嘔發熱而咳或渴或利或噎或小便不利小腹滿或微喘屬小青龍湯

傷寒心下有水氣欬而微喘發熱不渴服湯已而渴者此寒去爲欲解屬小青龍湯

陽明中風脈弦浮大而短氣腹都滿脇下及心痛久按之氣不通一作按之不痛鼻乾不得汗嗜卧一身及目悉黃小

便難有潮熱時時噦耳前後腫刺之小瘥外不解病過十日脈續浮與小柴胡湯但浮無餘證與麻黃湯不溺腹滿加噦不治

太陽病十日以去脈浮細嗜卧此爲外解設胸滿脇痛
與小柴胡湯脈浮者屬麻黃湯

中風往來寒熱傷寒五六日以後胸脇苦滿嘿嘿不欲
飲食煩心喜嘔或胸中煩而不嘔或渴或腹中痛或脇
下痞堅或心中悸小便不利或不渴外有微熱或欬者
屬小柴胡湯

傷寒四五日身體熱惡風頸項強脇下滿手足溫而渴
屬小柴胡湯

傷寒六七日發熱微惡寒支節煩疼微嘔心下支結外

證未去者屬小柴胡湯

少陰病得之二三日麻黃附子甘草湯微發汗以二三日無裏證故微發汗也

脈浮小便不利微熱消渴與五苓散利小便發汗

病發汗以後證第三

二陽併病太陽初得病時發其汗汗先出復不徹因轉屬陽明續自微汗出不惡寒若太陽證不罷不可下下之爲逆如此者可小發其汗設面色緣緣正赤者陽氣拂鬱在表當解之熏之若發汗不大徹不足言陽氣拂

鬱不得越當汗而不汗其人躁煩不知痛處乍在腹中乍在四肢按之不可得其人短氣但坐汗出而不徹故也更發其汗卽愈何以知其汗不徹脈澀故以知之未持脈時病人叉手自冒心師因教試令欬而不卽欬者此必兩耳無所聞也所以然者重發其汗虛故也

發汗後飲水多者必喘以水灌之亦喘

發汗後水藥不得入口爲逆若更發其汗必吐下不止陽明病本自汗出醫復重發其汗病已瘥其人微煩不了了此大便堅也以亡津液胃中乾燥故令其堅當問

小便日幾行若本日三四行今日再行者必知大便不久出今爲小便數少津液當還入胃中故知必當大便也

發汗多又復發其汗此爲亡陽若譫語脈短者死脈自和者不死

傷寒發其汗身目爲黃所以然者寒食案食居敬本作濕相搏

在裏不解故也

病人有寒復發其汗胃中冷必吐衄

太陽病發其汗遂漏而不止其人惡風小便難四肢微

急難以屈伸屬桂枝加附子湯

服桂枝湯大汗出若脈但洪大與桂枝湯若其形如瘧
一再三發汗出便解屬桂枝二麻黃一湯

服桂枝湯大汗出大煩渴不解若脈洪大屬白虎湯

傷寒脈浮自汗出小便數煩復微惡寒而腳攣急反與
桂枝湯欲攻其表得之便厥咽乾煩躁吐逆當作甘草
乾薑湯以復其陽厥愈足溫更作芍藥甘草湯與之其
腳卽伸而胃氣不和譫語可與承氣湯重發其汗復加
燒針者屬四逆湯

傷寒發汗以解半日許復煩其脈浮數可復發其汗屬桂枝湯

發汗後身體疼痛其脈沈遲屬桂枝加芍藥生薑人參湯

發汗後不可更行桂枝湯汗出而喘無大熱可以麻黃杏子甘草石膏湯

發汗過多以後其人叉手自冒心心下悸而欲得按之屬桂枝甘草湯

發汗後其人臍下悸欲作賁豚屬茯苓案茯苓二字各本無從傷寒論

增 桂枝甘草大棗湯

發汗後腹脹滿屬厚樸生薑半夏甘草人參湯發其汗不解而反惡寒者虛故也屬芍藥甘草附子湯不惡寒但熱者實也當和其胃氣宜小承氣湯

太陽病發汗若大汗出胃中燥煩不得眠其人欲飲水當稍飲之令胃中和則愈

發汗已脈浮而數復煩渴者屬五苓散

傷寒汗出而渴屬五苓散不渴屬茯苓甘草湯

太陽病發其汗汗出不解其人發熱心下悸頭眩身瞤

而動振振欲擗地屬元武湯

傷寒汗出解之後胃中不和心下痞堅乾噫食臭脇下有水氣腹中雷鳴而利屬生薑瀉心湯

傷寒發熱汗出不解後心中痞堅嘔而下利屬大柴胡湯

太陽病三日發其汗不解蒸蒸發熱者屬於胃也屬承氣湯

大汗出熱不去內拘急四肢疼下利厥逆而惡寒屬四逆湯

發汗多亡陽譫語者不可下與柴胡桂枝湯和其榮衛
以通津液後自愈

病不可吐證第四

太陽病當惡寒而發熱今自汗出反不惡寒發熱關上
脈細而數此醫吐之過也若得病一日二日吐之腹中
飢口不能食三日四日吐之不喜糜粥欲食冷食朝食
暮吐此醫吐之所致也此爲小逆

太陽病吐之者但太陽當惡寒今反不惡寒不欲近衣
此爲吐之內煩也

少陰病飲食入則吐心中溫溫欲吐復不能吐始得之
手足寒脈弦遲此胸中實不可下若膈上有寒飲乾嘔
者不可吐當溫之

諸四逆厥者不可吐之虛家亦然

病可吐證第五

太法春宜吐

凡服湯吐中病便止不必盡劑也

病如桂枝證其頭不痛其項不强寸口脈微浮胸中痞
堅氣上撞咽喉不得息此爲胸有寒當吐之

脈經 卷七 五
病胸上諸實胸中鬱鬱而痛不能食欲使人按之而反
有濁唾下利日十餘行其脈反遲寸口微滑此可吐之
利卽止

少陰病飲食入卽吐心中溫溫欲吐復不能吐當遂吐
之

宿食在上脘當吐之

病者手足厥冷脈乍緊邪結在胸中心下滿而煩飢不
能食病在胸中當吐之

病不可下證第六

脈濡而弱弱反在關濡反在巔微反在上澀反在下微則陽氣不足澀則無血陽氣反微中風汗出而反躁煩澀則無血脈而且寒陽微不可下下則心下痞堅

動氣在右不可下下則津液內竭喉燥鼻乾頭眩心悸動氣在左不可下下之則腹裏拘急食不下動氣反劇身雖有熱臥反欲踈

動氣在上不可下下之則掌握熱煩身淨冷熱汗自泄欲水自灌

動氣在下不可下下之則腹滿卒起頭眩食則下清穀

心下痞堅

咽中閉塞不可下下之則上輕下重水漿不下卧則欲
踈身體急痛復下利日十數行

諸外實不可下下之則發微熱亡脈則厥當臍發

案發各本

作熱握

諸虛不可下下之則渴引水者易愈惡水者劇

脈濡而弱弱反在關濡反在巔弦反在上微反在下弦
爲陽運微爲陰寒上實下虛意欲得溫微弦爲虛虛者
不可下微則爲欬欬則吐涎沫下之欬則止而利不休

胸中如蟲齧粥入則出小便不利兩脇拘急喘息爲難

頸項

案項居敬
本作背

相牽臂則不仁極寒反出汗軀冷若冰

眼睛不慧語言不休穀氣多入則爲除中口雖欲言舌
不得前

脈濡而弱弱反在關濡反在巔浮反在上數反在下浮
爲陽虛數爲無血浮則爲虛數則生熱浮則爲虛自汗
而惡寒數則爲痛振而寒慄微弱在關胸下爲急喘滿
汗流不得呼吸呼吸之中痛在於脇振寒相搏其形如
瘧醫反下之令脈急數發熱狂走見鬼心下爲痞小便

淋瀝少腹甚堅小便血出

脈濡而緊濡則陽氣微緊則榮中寒陽微衛中風發熱而惡寒榮緊胃氣冷微嘔心內煩醫以爲大熱解肌而發汗亡陽虛煩躁心下苦痞堅表裏俱虛竭卒起而頭眩客熱在皮膚悵快不得眠不知胃氣冷緊寒在關元技巧無所施汲水灌其身客熱應時罷慄慄而振寒重被而覆之汗出而冒巔體惕而又振小便爲微難寒氣因水發清穀不容間嘔變反腸出顛倒不得安手足爲微逆身冷而內煩遲欲從後救安可復追還

脈浮而大浮爲氣實大爲血虛血虛爲無陰氣實爲孤陽當小便難胞中虛今反小便利而大汗出法衛家當微今反更實津液四射榮竭血盡虛煩不眠血薄內消而成暴液醫以藥攻其胃此爲重虛客陽去有期必下如汗泥而死

趺陽脈遲而緩胃氣如經也趺陽脈浮而數浮則傷胃數則動脾此非本病醫特下之所爲也

榮衛內陷其數先微脈反但浮其人必大便堅氣噫而除何以言之脾脈本緩今數脈動脾其數先微故知脾

氣不治大便堅氣噫而除今脈反浮其數改微邪氣獨

留心中則飢邪熱案居敬本此下有「不字」殺穀潮熱發渴數脈當

遲緩脈因前後度數如法病者則飢數脈不時則生惡

瘡袁校云疑有脫誤

脈數者久數不止止則邪結正氣不能復正氣卻結於

藏故邪氣浮之與皮毛相得脈數者不可下下之必煩

利不止

少陰病脈微不可發其汗無陽故也陽已虛尺中弱澀

者復不可下之

脈浮大應發其汗醫反下之此爲大逆

脈浮而大心下反堅有熱屬藏者攻之不令發汗屬腑者不令洩數洩數則大便堅汗多則熱愈汗少則便難脈遲尙未可攻

二陽併病太陽初得病時發其汗汗先出復不徹因轉屬陽明欲自汗出不惡寒若太陽證不罷不可下下之爲逆

結胸證其脈浮大不可下下之卽死

太陽與陽明合病喘而胸滿不可下之

太陽與少陽併病心下痞堅頸項強而眩勿下之

諸四逆厥者不可下之虛家亦然

病欲吐者不可下之

太陽病有外證未解不可下下之為逆

病發於陽而反下之熱入因作結胸發於陰而反下之

因作痞

病脈浮緊而下之緊反入裏因作痞

夫病陽多者

案居敬本作有

熱下之則堅

本虛攻其熱必噦

無陽陰強而堅下之必清穀而腹滿

太陰之爲病腹滿而吐食不下下之益甚腹時自痛胸
下結堅

厥陰之爲病消渴氣上撞心中疼熱飢而不欲食甚者
則欲吐下之不肯止

少陰病其人飲食入則吐心中溫溫欲吐復不能吐始
得之手足寒脈弦遲此胸中實不可下也

傷寒五六日不結胸腹濡脈虛復厥者不可下下之亡
血死

傷寒發熱但頭痛微汗出發其汗則不識人熏之則喘
不得小便心腹滿下之則短氣而腹滿小便難頭痛背
強加溫針則必衄

傷寒其脈陰陽俱緊惡寒發熱則脈欲厥厥者脈初來
大漸漸小更來漸大是其候也惡寒甚者翕翕汗出喉
中痛熱多者目赤睛不慧醫復發之咽中則傷若復下
之則兩目閉寒多清穀熱多便膿血熏之則發黃熨之
則咽燥小便利者可救難者必危殆

傷寒發熱口中勃勃氣出咳痛目黃衄不可制貪水者

必嘔惡水者厥下之咽中生瘡假令手足溫者下之此案

下之二字泰定居敬本無下重便膿血頭痛目黃者下之目閉貪水

者下之其脈必厥其聲嚶咽喉塞發其汗則戰慄陰陽俱虛惡水者下之裏冷不嗜食大便完穀出發其汗口中傷舌上胎滑煩躁脈數實不大便六七日後必便血復發其汗小便必自利

得病二三日脈弱無太陽柴胡證而煩躁心下鞭至四

五案五字各本無從傷寒論增日雖能食以承氣湯少與微和之令

小安至六日與承氣湯一升不大便六七日小便少者

雖不大便但頭堅後澇未定成堅攻之必澇當須小便
利定堅乃可攻之

藏結無陽證寒而不熱

傷寒論云不
往來寒熱

其人反靜舌上胎

滑者不可攻也

傷寒嘔多雖有陽明證不可攻之

陽明病潮熱微堅者可與承氣湯不堅不可與若不
大便六七日恐有燥屎欲知之法可少與小承氣湯腹中
轉失氣者此為有燥屎乃可攻之若不轉失氣者此但
頭堅後澇不可攻之攻之必腹滿不能食欲飲水者即

噦其後發熱者必復堅以小承氣湯和之若不轉失氣者慎不可攻之

陽明病身汗色赤者不可攻也必發熱色黃者小便不利也

陽明病當心下堅滿不可攻之攻之遂利不止者死止者愈

陽明病自汗出若發其汗小便自利此爲內竭雖堅不可攻之當須自欲大便宜蜜煎導而通之若土瓜根及猪膽汁皆可以導

下利其脈浮大此為虛以強下之故也設脈浮革因爾
腸鳴屬當歸四逆湯

病可下證第七

大法秋宜下

凡可下者以湯勝丸散中病便止不必盡服之

陽明病發熱汗多者急下之屬大柴胡湯

少陰病得之二三日口燥咽乾者急下之屬承氣湯

少陰病六七日腹滿不大便者急下之屬承氣湯

少陰病下利清水色青者心下必痛口乾燥者可下之

屬大柴胡湯承氣湯

下利三部脈皆平按其心下堅者可下之屬承氣湯

陽明與少陽合病而利脈不負者為順負者失也互相

剋賊為負

滑而數者有宿食當下之屬大柴胡湯承氣湯

傷寒後脈沈沈為內實

玉函云脈沈實沈實者下之

下之解屬大柴

胡湯

傷寒六七日目中不了了睛不和無表裏證大便難微

熱者此為實急下之屬大柴胡湯承氣湯

太陽病未解其脈陰陽俱停必先振汗出解但陽微者
先汗之而解但陰微者先下之而解屬大柴胡湯陰微一作

尺實

脈雙弦遲心下堅脈大而緊者陽中有陰可下之屬承

氣湯

結胸者項亦強如柔痙狀下之即和

病者無表裏證發熱七八日雖脈浮數可下之屬大柴

胡湯

太陽病六七日表證續在其脈微沈反不結胸其人發

狂此熱在少焦少腹當堅而滿小便自利者下血乃愈
所以然者以太陽隨經瘀熱在裏故也屬抵當湯

太陽病身黃其脈沈結少腹堅小便不利爲無血小便
自利其人如狂者血證諦屬抵當湯

傷寒有熱而少腹滿應小便不利而反利者此爲血當
下之屬抵當丸

陽明病發熱而汗出此爲熱越不能發黃但頭汗出其
身無有齊頸而還小便不利渴飲水漿此爲瘀熱在裏
身必發黃屬茵陳蒿湯

陽明證其人喜忘必有畜血所以然者本有久瘀血故
令喜忘雖堅大便必黑屬抵當湯

汗出而譫語者有燥屎在胃中此風也過經乃可下之
下之若早語言亂以表虛裏實故也下之則愈屬大柴
胡湯承氣湯

病者煩熱汗出即解復如瘧狀日晡所發者屬陽明脈
實者當下之屬大柴胡湯承氣湯

陽明病譫語有潮熱而反不能食者必有燥屎五六枚
若能食者但堅耳屬承氣湯

太陽中風下利嘔逆表解乃可攻之其人熱熱汗出發
作有時頭痛心下痞堅滿引脇下痛嘔而短氣汗出不
惡寒此爲表解裏未和屬十棗湯

太陽病不解熱結膀胱其人如狂血自下下者卽愈其
外未解尙未可攻當先解其外外解小腹急結者乃可
攻之屬桃仁承氣湯

傷寒七八日身黃如橘小便不利少腹微滿屬茵陳蒿
湯

傷寒十餘日熱結在裏復往來寒熱屬大柴胡湯

但結胸無大熱此爲水結在胸脇頭微汗出與大陷胸湯

傷寒六七日結胸熱實其脈沈緊心下痛按之如石堅與大陷胸湯

陽明病其人汗多津液外出胃中燥大便必堅堅者必譫語屬承氣湯

陽明病不吐下而心煩者可與承氣湯

陽明病其脈遲雖汗出而不惡寒其體必重短氣腹滿而喘有潮熱如此者其外爲解可攻其裏若手足濇然

汗出者此大便已堅屬承氣湯其熱不潮未可與承氣湯若腹滿大而不大便者屬小承氣湯微和胃氣勿令至大下

陽明病譫語發潮熱其脈滑疾如此者屬承氣湯因與承氣湯一升腹中轉失氣者復與一升如不轉失氣者勿更與之明日又不大便脈反微澀者此爲裏虛爲難治不可更與承氣湯

二陽併病太陽證罷但發潮熱手足熱熱汗出大便難而譫語者下之愈屬承氣湯

病人小便不利大便乍難乍易時有微熱喘不能卧胃
有燥屎也屬承氣湯

病發汗吐下以後證第八

師曰病人脈微而澀者此爲醫所病也大發其汗又數
大下之其人亡血病當惡寒而發熱無休止時夏月盛
熱而欲著複衣冬月盛寒而欲裸其體所以然者陽微
卽惡寒陰弱卽發熱醫發其汗使陽氣微又大下之令
陰氣弱五月之時陽氣在表胃中虛冷以陽氣內微不
能勝冷故欲著複衣十一月之時陽氣在裏胃中煩熱

以陰氣內弱不能勝熱故欲裸其體又陰脈遲澀故知
亡血

太陽病三日已發其汗吐下溫針而不解此爲壞病桂
枝復不中與也觀其脈證知犯何逆隨證而治之

脈浮數法當汗出而愈而下之則身體重心悸不可發
其汗當自汗出而解所以然者尺中脈微以裏虛須表
裏實津液和卽自汗出愈

凡病若發汗若吐若下若亡血無津液而陰陽自和者
必愈

大下後發汗其人小便不利此亡津液勿治其小便利必自愈

下以後復發其汗必振寒又其脈微細所以然者內外俱虛故也

太陽病先下而不愈因復發其汗表裏俱虛其人因冒冒家當汗出自愈所以然者汗出表和故也表和然後下之

得病六七日脈遲浮弱惡風寒手足溫醫再三下之不能多

多一作食

其人脇下滿面目及身黃頸項強小便難與

柴胡湯後必下重大渴飲水而嘔柴胡湯不復中與也
食穀者噦

太陽病二三日終不能卧但欲起者心下必結其脈微
弱者此本寒也而反下之利止者必結胸未止者四五
日復重下之此挾熱利也

太陽病下之其脈促不結胸者此爲欲解其脈浮者必
結胸其脈緊者必咽痛其脈弦者必兩脇拘急其脈細
而數者頭痛未止其脈沈而緊者必欲嘔其脈沈而滑
者挾熱利其脈浮而滑者必下血

太陽少陽併病而反下之成結胸心下堅下利不復止
水漿不肯下其人必心煩

脈浮緊而下之緊反入裏則作痞按之自濡但氣痞耳
傷寒吐下發汗虛煩脈甚微八九日心下痞堅脇下痛
氣上衝咽喉眩冒經脈動惕者久而成痿

陽明病不能食下之不解其人不能食攻其熱必噦所
以然者胃中虛冷故也

陽明病脈遲食難用飽飽卽發煩頭眩者必小便難此
欲作穀疸雖下其腹滿如故耳所以然者脈遲故也

太陽病寸緩關浮尺弱其人發熱而汗出復惡寒不嘔
但心下痞者此爲醫下之也

傷寒大吐大下之極虛復極汗者其人外氣怫鬱復與
之水以發其汗因得噦所以然者胃中寒冷也

吐下發汗後其人脈平而小煩者以新虛不勝穀氣故
也

太陽病醫發其汗遂發熱而惡寒復下之則心下痞此
表裏俱虛陰陽氣併竭無陽則陰獨復加火針因而煩
面色青黃膚濼如此者爲難治面色微黃手足溫者易

愈

服桂枝湯下之頭項強痛翁翁發熱無汗心下滿微痛小便不利屬桂枝去桂加茯苓朮湯

太陽病先發其汗不解而下之其脈浮者不愈浮爲在外而反下之故令不愈今脈浮故在外當解其外則愈屬桂枝湯

下以後復發其汗者則晝日煩躁不眠夜而安靜不嘔不渴而無表證其脈沈微身無大熱屬乾薑附子湯傷寒吐下發汗後心下逆滿氣上撞胸起卽頭眩其脈

沈緊發汗卽動經身爲振搖屬茯苓桂枝朮甘草湯

發汗吐下以後不解煩躁屬茯苓四逆湯

傷寒發汗吐下後虛煩不得眠劇者反覆顛倒心中懊
懣屬梔子湯若少氣梔子甘草湯若嘔梔子生薑湯若
腹滿梔子厚樸湯

發汗若下之煩熱胸中塞者屬梔子湯

太陽病經過十餘日心下溫溫欲吐而胸中痛大便反
溏其腹微滿鬱鬱微煩先時自極吐下者與承氣湯不
爾者不可與欲嘔胸中痛微溏此非柴胡湯證以嘔故

別經
卷七
知極吐下也

太陽病重發其汗而復下之不大便五六日舌上燥而渴日晡小有潮熱從心下至少腹堅滿而痛不可近屬大陷胸湯

傷寒五六日其人已發汗而復下之胸脇滿微結小便不利渴而不嘔但頭汗出往來寒熱心煩此爲未解屬柴胡桂枝乾薑湯

傷寒汗出若吐下解後心下痞堅噫氣不除者屬旋覆代赭湯

大下以後不可更行桂枝湯汗出而喘無大熱可與麻

黃杏子甘草石膏湯

傷寒大下後復發其汗心下痞惡寒者表未解也不可
攻其痞當先解表表解乃攻其痞解表屬桂枝湯攻痞
屬大黃黃連瀉心湯

傷寒吐下後七八日不結熱結在裏表裏俱熱時時惡
風大渴舌上乾燥而煩欲飲水數升屬白虎湯

傷寒吐下後未解不大便五六日至十餘日其人日晡

所案傷寒論亦作所所許也袁發潮熱不惡寒獨語如
校本不得其解妄改爲時

見鬼神之狀若劇者發則不識人循衣妄撮怵惕不安
微喘直視脈弦者生澀者死微者但發熱譫語屬承氣
湯若下者勿復服

三陽合病腹滿身重難以轉側口中不仁面垢譫語遺
溺發汗則譫語下之則額上生汗手足厥冷自汗屬白
虎湯

陽明病其脈浮緊咽乾口苦腹滿而喘發熱汗出而不
惡寒反偏惡熱其身體重發其汗卽躁心憤憤而反譫
語加溫針必怵惕又煩躁不得眠下之卽胃中空虛客

氣動膈心中懊懣舌上胎者屬梔子湯

陽明病下之其外有熱手足溫不結胸心中懊懣苦

案苦

奉定居敬
本作若 飢不能食但頭汗出屬梔子湯

陽明病下之心中懊懣而煩胃中有燥屎者可攻其人
腹微滿頭堅後溏者不可下之有燥屎者屬承氣湯

太陽病吐下發汗後微煩小便數大便因堅可與小承
氣湯和之則愈

大汗若大下而厥冷者屬四逆湯

太陽病下之其脈促胸滿者屬桂枝去芍藥湯若微寒

別經 卷七 三
屬桂枝去芍藥加附子湯

傷寒五六日大下之身熱不去心中結痛者未欲解也
屬梔子湯

傷寒下後煩而腹滿卧起不安屬梔子厚樸湯

傷寒醫以丸藥大下之身熱不去微煩屬梔子乾薑湯
傷寒醫下之續得下利清穀不止身體疼痛急當救裏
身體疼痛清便自調急當救表救裏宜四逆湯救表宜
桂枝湯

太陽病過經十餘日反再三下之後四五日柴胡證續

在先與小柴胡湯嘔止小安嘔止小安一云其人鬱鬱

微煩者爲未解與大柴胡湯下則愈

傷寒十三日不解胸脇滿而嘔日晡所發潮熱而微利此本當柴胡湯下之不得利今反利者故知醫以丸藥下之非其治也潮熱者實也先再服小柴胡湯以解其外後屬柴胡加芒硝湯

傷寒十三日過經而譫語內有熱也當以湯下之小便利者大便當堅而反利其脈調和者知醫以丸藥下之非其治也自利者其脈當微厥今反和者此爲內實屬

承氣湯

傷寒八九日下之胸滿煩驚小便不利譫語一身不可轉側屬柴胡加龍骨牡蠣湯

火逆下之因燒針煩躁屬桂枝甘草龍骨牡蠣湯

太陽病脈浮而動數浮則為風數則為熱動則為痛數則為虛頭痛發熱微盜汗出而反惡寒其表未解醫反下之動數則遲頭痛即眩

一云膈內拒痛

胃中空虛客氣動膈

短氣煩躁心中懊懣陽氣內陷心下因堅則為結胸屬大陷胸湯若不結胸但頭汗出其餘無有齊頸而還小

便不利身必發黃屬柴胡梔子湯

案此句泰定居敬本皆無從袁校本

傷寒五六日嘔而發熱柴胡湯證具而以他藥下之柴胡證仍在復與柴胡湯此雖已下不為逆也必蒸蒸而振卻發熱汗出而解若心下滿而堅痛者此為結胸屬大陷胸湯若但滿而不痛者此為痞柴胡復不中與也屬半夏瀉心湯本以下之故心下痞與之瀉心其痞不解其人渴而口燥小便不利者屬五苓散

一本言忍之一日乃愈

傷寒中風醫反下之其人下利日數十行穀不化腹中雷鳴心下痞堅而滿乾嘔而煩不能得安醫見心下痞

為病不盡復重下之其痞益甚此非結熱但胃中虛客
氣上逆故使之堅屬甘草瀉心湯

傷寒服湯藥而下利不止心下痞堅服瀉心湯已復以

他藥下之利不止醫以理中與之利益甚理

案此與上
理字泰定

袁校本
俱作治

中理中焦此利在下焦屬赤石脂禹餘糧湯若

不止者當利其小便

太陽病外證未除而數下之遂挾熱而利不止心下痞

堅表裏不解屬桂枝人參湯

傷寒吐後腹滿者與承氣湯

病者無表裏證發熱七八日脈雖浮數者可下之假令
下已脈數不解今熱則消穀善飢至六七日不大便者
有瘀血屬抵當湯若脈數不解下之止必協熱便膿血
太陽病醫反下之因腹滿時痛爲屬太陰屬桂枝加芍
藥湯大實痛屬桂枝加大黃湯

傷寒六七日其人大下後脈沈遲手足厥逆下部脈不
至咽喉不利唾膿血泄利不止爲難治屬麻黃升麻湯
傷寒本自寒嘔醫反吐之寒格更遂吐食入卽出屬乾
薑黃芩黃連人參湯

病可溫證第九

大法冬宜溫熱藥及灸

師曰病發熱頭痛脈反沈若不瘥身體更疼痛當救其裏宜溫藥四逆湯

下利腹滿身體疼痛先溫其裏宜四逆湯

自利不渴者屬太陰其藏有寒故也當溫之宜四逆輩少陰病其人飲食入則吐心中溫溫欲吐復不能吐始得之手足寒脈弦遲若膈上有寒飲乾嘔者不可吐當溫之宜四逆湯

少陰病脈沈者急當溫之宜四逆湯

下利欲食者就當溫之

下利脈遲緊為痛未欲止當溫之得冷者滿而便腸垢

下利其脈浮大此為虛以強下之故也設脈浮革因爾

腸鳴當溫之宜當歸四逆湯

少陰病下利脈微澀者即吐

案居敬本作嘔

行者

案居敬本作汗出

必

數更衣反少當溫之

傷寒醫下之續得下利清穀不止身體疼痛急當救裏

宜溫之以四逆湯

病不可灸證第十

微數之脈慎不可灸因火爲邪則爲煩逆追虛逐實血散脈中火氣雖微內攻有力焦骨傷筋血難復也

脈浮當以汗解而反灸之邪無從去因火而盛病從腰以下必當重而痺此爲火逆若欲自解當先煩煩乃有汗隨汗而解何以知之脈浮故知汗出當解

脈浮熱甚而灸之此爲實實以虛治因火而動咽燥必吐血

病可灸證第十一

燒針令其汗針處被寒核起而赤者必發賁脈氣從少
腹上撞者灸其核上一壯與桂枝加桂湯

少陰病得之一二日口中和其背惡寒者當灸之

少陰病其人吐利手足不利反發熱不死脈不足者灸
其少陰七壯

少陰病下利脈微澀者即嘔行者必數更衣反少當溫

其上灸之

一云灸厥陰
可五十壯

諸下利皆可灸足大都五壯

一云七壯

商邱陰陵泉皆三壯

下利手足厥無脈灸之不溫反微喘者死少陰負趺陽

者為順也

傷寒六七日其脈微手足厥煩躁灸其厥陰厥不還者死

傷寒脈促手足厥逆可灸之為可灸少陰厥陰主四案

字泰定居
敬本無逆

病不可刺證第十二

大怒無刺大一已刺無怒已一新肉無刺已刺無肉大

勞無刺大一已刺無勞大醉無刺已刺無醉大飽無刺

已刺無飽大飢無刺已刺無飢大渴無刺已刺無渴無

刺大驚無刺熇熇之熱無刺漉漉之汗無刺渾渾之脈
身熱甚陰陽皆爭者勿刺也其可刺者急取之不汗則
洩所謂勿刺者有死徵也無刺病與脈相逆者上工刺
未生其次刺未盛其次刺已衰麤工逆此謂之伐形出九

卷案此三字
袁校本無

病可刺證第十三

太陽病頭痛至七日自當愈其經竟故也若欲作再經
者當針足陽明使經不傳則愈

太陽病初服桂枝湯而反煩不解者當先刺風池風府

乃卻與桂枝湯則愈

傷寒腹滿而譫語寸口脈浮而緊者此爲肝乘脾名縱
當刺期門

傷寒發熱嗇嗇惡寒其人大渴欲飲酢漿者其腹必滿
而自汗出小便利其病欲解此爲肝乘肺名曰橫當刺
期門

陽明病下血而譫語此爲熱入血室但頭汗出者當刺
期門隨其實而瀉之澌然汗出者則愈

婦人中風發熱惡寒經水適來得之七八日熱除脈遲

身涼胸脇下滿如結胸狀其人譫語此爲熱入血室當

刺期門隨其虛實而取之

平病云熱入血室無犯胃氣及上三焦與此相反豈謂藥

不爲針耶案九卷平病三焦作二焦注云二字疑上二焦或指上焦中焦言作三焦當誤

太陽與少陽併病頭痛頸項強而眩時如結胸心下痞

堅當刺大杼一間

案一間上居敬本有第字

肺輸肝輸慎不可發汗

發汗則譫語譫語則脈弦譫語五日不止當刺期門

少陰病下利便膿血者可刺

婦人傷寒懷身腹滿不得小便如從腰以下重如有水

氣狀懷身七月太陰當養不養此心氣實當刺瀉勞宮

及關元小便利則愈

傷寒喉痺刺手少陰少陰在腕當小指後動脈是也針入三分補之

問曰病有汗出而身熱煩滿煩滿不爲汗解者何對曰汗出而身熱者風也汗出而煩滿不解者厥也病名曰風厥也太陽主氣故先受邪少陰與爲表裏也得熱則上從之從之則厥治之

案之袁校本作從

表裏刺之飲之湯

熱病三日氣口靜人迎躁者取之諸陽五十九刺以瀉其熱而出其汗實其陰以補其不足所謂五十九刺者

兩手外內側各三凡十二疔五指間各一凡八疔足亦如是頭入髮一寸傍三分各三凡六疔更入髮三寸邊各五凡十疔耳前後口下項中各一凡六疔巔上一熱病先膚痛窒鼻充面取之皮以第一針五十九苛菌爲軫一云苛軫鼻索皮於肺不得索之火火心也

熱病隘乾多飲善驚卧不能安取之膚肉以第六針五十九目眇赤索肉於脾不得索之木木肝也

熱病而胸脇痛手足躁取之筋間以第四針針於四達

一作逆筋辟目浸索筋於肝不得索之金金肺也

熱病數驚癡癡而強取之脈以第四針急瀉有餘者癩

疾毛髮去索血脈一作於心不得索之水水腎也

熱病身重骨痛耳聾而好瞑取之骨以第四針五十九

骨病時齧牙齒耳清索骨於腎不得索之土土脾也

熱病先身濇傍教傍教太素作倚煩悶乾唇噓取之以第一針

五十九膚脹口乾寒汗

熱病頭痛攝攝一作顛顛目脈緊善衄厥熱也取之以第三

針視有餘不足寒熱病

熱病體重腸中熱取之以第四針於其輪及下諸指間

索氣於胃絡得氣也

熱病俠臍痛急胸脇支滿取之涌泉與太陰陽明

一云陰陵

泉以第四針針嗑裏

熱病而汗且出反脈順可汗者取之魚際太淵太都太
白瀉之則熱去補之則汗出汗出太甚者取踝上橫文
以止之

熱病七八日脈口動喘而眩者急刺之汗且自出淺刺
手大指間

熱病先胸脇痛手足躁刺足少陽補手太陰病甚爲五

十九刺

熱病先手臂痛刺手陽明太陰而汗出止

熱病始於頭手

案泰定本作首

者刺項太陽而汗出止

熱病先身重骨痛耳聾目瞑刺足少陰病甚為五十九

刺

一云刺少陽

熱病先眩冒而熱胸膈滿刺足少陰少陽

熱病始足脛者先取足陽明而汗出止

病不可水證第十四

發汗後飲水多者必喘以水灌之亦喘

傷寒大吐大下之極虛復極汗者其人外氣怫鬱復與
之水以發其汗因得噦所以然者胃中寒冷故也

陽明病潮熱微堅可與承氣湯不堅勿與之若不大便
六七日恐有燥屎欲知之法可與小承氣湯若腹中不
轉矢氣者此爲但頭堅後溏不可攻之攻之必腹滿不
能食欲飲水者卽噦

陽明病若胃中虛冷其人不能食飲水卽噦

下利其脈浮大此爲虛以下強之故也設脈浮革因爾
腸鳴當溫之與水卽噦

病在陽身以汗解而反以水噴之若灌之其熱卻不得去益煩皮上粟起意欲飯水反而案而寫本作熱疑當作不渴宜文蛤散若不瘥與五苓散

若寒實結胸無熱證者與三物小陷胸湯白散亦可身熱皮粟不解欲引衣自覆若以水噴之洗之益令熱卻不得出當汗而不汗即煩假令汗出已腹中痛與芍藥三兩如上法

寸口脈浮大醫反下之此為大逆浮即無血大即為寒寒氣相搏即為腸鳴醫乃不知而反飲水令汗大出水

得寒氣冷必相搏其人卽餒

案各本作餒泰定本作餒音義同噎正字通云字彙

引靈樞經餒不得息譌作餒

寸口脈濡而弱濡卽惡寒弱卽發熱濡弱相搏藏氣衰微胸中苦煩此非結熱而反薄居水漬布冷鈹貼之陽氣遂微諸府無所依陰脈遲聚結在心下而不肯移胃中虛冷水穀不化小便縱通復不能多微則可救聚寒心下當奈何也

病可水證第十五

太陽病發汗後若大汗出胃中乾燥煩不得眠其人欲

脈經 卷七
三
飲水當稍飲之令胃中和則愈

厥陰病渴欲飲水者與飲之即愈

太陽病寸口緩關上小浮尺下弱其人發熱而汗出復惡寒不嘔但心下痞者此爲醫下之也若不下其人復不惡寒而渴者爲轉屬陽明小便數者大便即堅不更衣十日無所苦也欲飲水者但與之當以法救之宜五苓散

寸口脈洪而大數而滑洪大則榮氣長滑數則胃氣實榮長則陽盛怫鬱不得出身胃實則堅難大便則乾燥

三焦閉塞津液不通醫發其汗陽盛不周復重下之胃
燥熱畜大便遂攢小便不利榮衛相搏心煩發熱兩眼
如火鼻乾面赤舌燥齒黃焦故大渴過經成壞病針藥
所不能制與水灌枯槁陽氣微散身塞溫衣覆汗出表
裏通然其病卽除形脈多不同此愈非法治但醫所當
慎妄犯傷榮衛

霍亂而頭痛發熱身體疼痛熱多欲飲水屬五苓散

嘔吐而病在膈上後必思水者急與豬苓散飲之水亦
得也

病不可火證第十六

太陽中風以火劫發其汗邪風被火熱血氣流洗失其常度兩陽相熏灼其身發黃陽盛則欲衄陰虛小便難陰陽俱虛竭身體則枯燥但頭汗出齊頸而還腹滿而微喘口乾咽爛或不大便久則譫語甚則至噦手足躁擾循衣摸牀小便利者其人可治

太陽病醫發其汗遂發熱而惡寒復下之則心下痞此表裏俱虛陰陽氣併竭無陽則陰獨復加火針因而煩面色青黃膚濇如此者爲難治面色微黃手足溫者愈

傷寒加溫針必驚

陽脈浮陰脈弱則血虛血虛則筋惕其脈沈者榮氣微也其脈浮而汗出如流珠者衛氣衰也榮氣微加燒針血留不行更發熱而燥煩也

傷寒脈浮而醫以火迫劫之亡陽驚狂起卧不安屬桂枝去芍藥加蜀漆牡蠣龍骨救逆湯

問曰得病十五十六日身體黃下利狂欲走師脈之言當下清血如豚肝乃愈後如師言何以知之師曰寸口脈陽浮陰濡弱陽浮則爲風陰濡弱爲少血浮虛受風

少血發熱惡寒洒淅項強頭眩醫加火熏鬱令汗出惡寒遂甚客熱因火而發怫鬱蒸肌膚身目爲黃小便微難短氣從鼻出血而復下之胃無津液泄利遂不止熱瘀在膀胱畜結成積聚狀如豚肝當下未下心亂迷憤狂走赴水不能自制畜血若去目明心了此皆醫所爲無他禍患微輕得愈極者不治

傷寒其脈不弦緊而弱者必渴被火必譫語弱者發熱脈浮解之當汗出愈

太陽病以火熏之不得汗其人必躁到經不解必有清

血

陽明病被火額上微汗出而小便不利必發黃

陽明病其脈浮緊咽乾口苦腹滿而喘發熱汗出而不惡寒反偏惡熱其身體重發其汗則躁心憤憤而反譫語加溫針必怵惕又煩躁不得眠

少陰病欬而下利譫語是爲被火氣劫故也小便必難爲強責少陰汗也

太陰病二日而燒瓦熨其背大汗出火氣入胃胃中竭燥必發譫語十餘日振而汗反出者此爲欲解其汗從

腰以下不得汗其人欲小便反不得嘔欲失溲足下惡風大便堅者小便當數而反不數及多便已其頭卓然而痛其人足心必熱穀氣下流故也

病可火證第十七

下利穀道中痛當溫之以火宜熬末鹽熨之一方炙枳實熨之

八 熱病陰陽交并少陰厥逆陰陽竭盡生死證第十

問曰溫病汗出輒復熱而脈躁疾不爲汗衰狂言不能

食病名爲何對曰名曰陰陽交交者死人所以汗出者
生於穀穀生於精今邪氣交爭於骨肉而得汗者是邪
卻而精盛精盛則當能食而不復熱熱者邪氣也汗者
精氣也今汗出而輒復熱者邪勝也不能食者精無裨
也汗出而熱留者壽可立而傾也夫汗出而脈尙躁盛
者死今脈不與汗相應此不能勝其病也狂言者是失
志失志者死此有三死不見一生雖愈必死

熱病已得汗而脈尙躁盛此陽脈之極也死其得汗而
脈靜者生也

熱病脈尙躁盛而不得汗者此陽脈之極也死脈躁盛得汗出者生也

熱病已得汗而脈尙躁喘且復熱勿膚刺喘甚者死

熱病陰陽交者死

熱病煩已而汗脈當靜

太陽病脈反躁盛者是陰陽交死得汗脈靜者生

熱病陰陽交者熱煩身躁太陰寸口脈兩衝而躁盛是

陰陽交死得汗脈靜者生

熱病陽進陰退頭獨汗出死陰進陽退腰以下至足汗

出亦死陰陽俱進汗出已熱如故亦死陰陽俱退汗出已寒慄不止鼻口氣冷亦死

右熱病陰陽交部

熱病所謂并陰者熱病已得汗因得泄是謂并陰故治

一作活

熱病所謂并陽者熱病已得汗脈尚躁盛大熱汗出雖不汗出若衄是謂并陽故治

右熱病并陰陽部

少陰病惡寒踈而利手足逆者不治

少陰病下利止而眩時時自冒者死

少陰病其人吐利躁逆者死

少陰病四逆惡寒而踈其脈不至其人不煩而躁者死

少陰病六七日其人息高者死

少陰病脈微細沈但欲卧汗出不煩自欲吐五六日自

利復煩躁不得卧寐者死

少陰病下利若利止惡寒而踈手足溫者可治

少陰病惡寒而踈時時自煩欲去其衣被者可治

少陰病下利不止厥逆無脈乾嘔煩服湯藥其脈暴出

者死微續者生

右少陰部

傷寒六七日其脈微手足厥煩躁灸其厥陰厥不還者死

傷寒下利厥逆躁不能卧者死

傷寒發熱下利至厥不止者死

傷寒厥逆六七日不利便發熱而利者生其大汗出利不止者死但有陰無陽故也

傷寒五六日不結胸腹濡脈虛復厥者不可下下之亡

血死

傷寒發熱而厥七日下利者爲難治

右厥逆部

熱病不知所痛不能自收口乾陽熱甚陰頗有寒者熱在髓死不治

熱病在腎令人渴口乾舌焦黃赤晝夜欲飲不止腹大而脹尙不厭飲目無精光死不治

脾傷卽中風陰陽氣別離陰不從陽故以三分候其死生

傷寒欬逆上氣其脈散者死謂其人形損故也

傷寒下利日十餘行其人脈反實者死

病者脇下素有痞而不

案不敬敬
本作下

在臍傍痛引少腹入

陰俠陰筋此爲藏結死

夫實則譫語虛則鄭聲鄭聲者重語是也直視譫語喘
滿者死若下利者亦死

結胸證悉具而煩躁者死

吐舌下卷者死唾如膠者難解舌頭四邊徐有津液此
爲欲解病者至經上脣有色脈自和爲欲解色急者未

解

右陰陽竭盡部

重實重虛陰陽相附生死證第十九

問曰何謂虛實對曰邪氣盛則實精氣奪則虛重實者
內有熱病氣熱脈滿是謂重實問曰經絡俱實何如對
曰經絡皆實是寸脈急而尺內緩也皆當俱治故曰滑
則順濇則逆夫虛實者皆從其物類始五藏骨肉滑則
案則居敬可以長久寒氣暴上脈滿實實而滑順則生
木作利

實而濇逆則死形盡滿脈急大堅尺滿而不應順則生

逆則死所謂順者手足溫所謂逆者手足寒也

問曰何謂重虛對曰脈虛氣虛尺虛是謂重虛所謂氣

虛者言無常也尺虛者行步

案泰定居敬本皆作匡

然也脈虛

者不象陰也如此者滑則生濇則死氣虛者肺虛也氣逆者足寒也非其時則生當其時則死餘藏皆如此也

脈實滿手足寒頭熱者春秋則生冬夏則死脈浮而濇濇而身有熱者死絡氣不足經氣有餘脈熱而尺寒秋冬爲逆春秋爲順經虛絡滿者尺熱滿而脈寒濇春夏死秋冬生絡滿經虛灸陰刺陽經滿絡虛刺陰灸陽

問曰秋冬無極陰春夏無極陽何謂也對曰無極陽者
春夏無數虛陽明陽明虛則狂無極陰者秋冬無數虛
太陰太陰虛則死

右重實重虛部

熱病所謂陽附陰者腰以下至足熱腰以上寒陰氣下
爭還心腹滿者死所謂陰附陽者腰以上至頭熱腰以
下寒陽氣上爭還得汗者生

右陰陽相附部

熱病生死期日證第二十

太陽之脈色榮顴骨熱病也榮未和曰今且得汗待時
自己與厥陰脈爭見者死期不過三日其熱病氣內連
腎少陽之脈色榮頰前熱病也榮未和曰今且得汗待
時自己與少陰脈爭見者死期不過三日和一
作天
熱病七八日脈微小病者溲血口中乾一日半而死脈
代者一日死

熱病七八日脈不躁喘不數後三日中有汗三日不汗

四日死未會汗勿膚刺

膚一
作膚

熱病三四日脈不喘其動均者身雖煩熱今自得汗生

傳曰始府入藏終陰復還故得

熱病七八日脈不喘其動均者生微熱在陽不入陰今
自汗也

熱病七八日脈不喘動數均者病當瘖期三日不得汗
四日死

熱病身面盡黃而腫心熱口乾舌卷焦黃黑身麻臭伏
毒傷肺中脾者死

熱病瘕癰狂言不得汗瘕癰不已伏毒傷肝中膽者死
熱病汗不出出不至足嘔膽吐血善驚不得卧伏毒在

肝腑足少陽者死

熱病十逆死證第二十一

熱病腹滿臘脹身熱者不得大小便脈瀯小疾一逆見死

熱病腸鳴腹滿四肢清泄注脈浮大而洪不已二逆見死

熱病大衄不止腹中痛脈浮大絕喘而短氣三逆見死
熱病嘔且便血奪形肉身熱甚脈絕動疾四逆見死
熱病欬喘悸眩身熱脈小疾奪形肉五逆見死

熱病腹大而脹四肢清奪形肉短氣六逆見一旬內死
熱病腹脹便血脈大時時小絕汗出而喘口乾舌焦視
不見人七逆見一旬死

熱病身熱甚脈轉小咳而便血目眶陷妄言手循衣縫
口乾燥擾不得卧八逆見一時死

熱病癡癡狂走不能食腹滿胸痛引腰臍背嘔血九逆
見一時死

熱病嘔血喘咳煩滿身黃其腹鼓脹泄不止脈絕十逆
見一時死

熱病五藏氣絕死日證第二十二

熱病肺氣絕喘逆欬唾血手足腹腫面黃振慄不能言語死魄與皮毛俱去故肺先死丙日篤丁日死

熱病脾氣絕頭痛嘔宿汁不能食嘔逆吐血水漿不得入狂言謔語腹大滿四肢不收意不樂死脈與肉氣俱去故脾先死甲日篤乙日死

熱病心主氣絕煩滿骨痛

一作瘰

隘腫不可咽欲欬不能

欬歌哭而笑死神與榮脈俱去故心先死壬日篤癸日死

熱病肝氣絕僵仆足不安地嘔血恐懼洒淅惡寒血妄
出遺屎溺死魂與筋血俱去故肝先死庚日篤辛日死
熱病腎氣絕喘悸吐逆踵尻癱目視不明骨痛短氣
喘滿汗出如珠死精與骨髓俱去故腎先死戊日篤己
日死

外見瞳子青小爪甲枯髮墮身澀齒挺而垢又皮面厚
塵黑咳而吐血渴欲數飲腹大滿此五藏絕表病也

熱病至脈死日證第二十三

熱病脈四至三日死脈四至者平人一至病人脈四至

也

熱病脈五至一日死時一大至半日死忽忽悶亂者死
熱病脈六至半日死忽急疾大至有頃死

熱病損脈死日證第二十四

熱病脈四損三日死所謂四損者平人四至病人脈一
至名曰四損

熱病脈五損一日死所謂五死者平人五至病人脈一
至名曰五損

熱病脈六損一時死所謂六損者平人六至病人脈一

至名曰六損若絕不至或久乃至立死